




如阜縣志




如臯縣志卷十八

列女傳一 烈婦 貞女

婦人女子之行義視丈夫為難而其用心最摯往往為烈男子之所不能為苦節堅貞數十年如一日大變當前憤不顧身又非有所慕有所趨效而勉以從事也臯邑有烈女祠列位以祀者數百氏始亦英烈之氣鍾于婦人女子者較他邑為尤多歟志列女

烈婦

明葛氏諸生張可學妻歸可學僅一載可學疾革與葛訣曰死吾命也而難捐若葛泣曰君脫不諱妾有從地下耳檢釵鈿衣物置一笥付其姑潛入別室投繯死姑啟



笥視之殯殮之具悉備可學亦尋卒兩柩並舉聞者莫不悲歎縣令仇旻往賻其喪親撰文以祭復爲營塚葬之今祀貞烈祠崇禎六年旌

盧氏其夫李祐嘉靖中徙常熟倚豪民張島居島見盧及女俱有容色遂誘其夫沉之江梓言被盜旣而盧知狀痛夫仇不得雪欲自縊以殉島密遣老媪與居晝夜防之少間以妻弟議婚其女乃議自妻盧強委禽焉盧窘憤無脫計給老媪出戶闔門礮及先刺女媪覺急救之乃自刎島召其妻弟乘暮昇二尸焚之島族弟與島素有卻遙見島宅中火光排闥入佯爲策曰暮夜誰知者何爲以火光驚人乎令瘞尸竹林中後巡按陳蕙廉其

事發尸驗之島與其妻弟始伏辜常熟令羅鴻立祠祀之唐順之爲之記縣尹童蒙吉聞而異之曰此臯產也

置祠縣治西勒其事於石顏曰二烈云今合祀列女祠

余孝光所作如臯二烈傳謂常熟縣志及唐順之祠記事皆失實孝光館白茆時有老人目覩其事爲詳述之孝光遂爲作傳先後頗有條理

紀氏王律妻也律居西郊有田數畝夫婦躬耕生一女律病幼紀年二十叔氏利其田與其父母謀嫁之已入他家聘貲紀窘負女倉皇走入城請解於其兄士選兄適他出不值紀歸計無復之遂扃戶解一縻纏女吭仆之復以一縻纏吭踞夫柩前鄰人覺排戶入救其女生而紀已死矣

陳氏故蘭谿人生於臯父死隨母適李李亦蘭谿人以氏
贅邑毗萬賞李復死母又他適賞夫婦無依移佃豪家
田居北郭外豪瞰其美賂賞欲得氏賞傭奴也遂許焉
語氏氏詈不從晨起賞出而豪至以金挑之氏大詬適
盟以盆水擊其面豪意沮復賂賞遷之城申氏大哭過
市一市人皆知之氏度不能免抵所遷室闔戶自經死
賞逃去竟無白其冤者

洪氏諸生張維新繼室維新穎敏善屬文而伉爽負意氣
有姑適人而寡其家欲嫁之不從偽爲盜夜縛之去姑
斷髮髻面以死誓獲免維新走白臺使治之爲姑樹嗣
焉其家恨之因以事中生坐視維新竟以毒死生且死

張曰與洪訣洪爲好語慰之退而泣謂生妹曰吾夫殆
不起卽夜之別室扁戶繼年二十五方治棺歛維新亦
瞑遂同室殯焉死之先數日發笥取故中裙敝襪潛火
之人莫測其意是夜盥櫛更新衣站烏飭束潔齊悉施
衿焉乃死生姑聞而拊膺痛哭曰吾乃不能如烈婦死
吾如烈婦死維新不死矣吾髡而囚茹荼集蓼百折而
不能死者恐若敖之鬼餒爾

拙存齋紀事云維新前妻
子聯芳爲後母洪請旌爲
仇胥所逼不得達崇禎六年邑人冒起宗
力控於饒直指乃得題旌饒直指名京

何氏陳世紀妻陳病瘵死何年十七遺腹生男甫三歲父
何京屢欲奪其志一日迎之歸寧何曰母亡奚歸父欲
我嫁我卽嫁耳隨盛粧服設奠哭夫靈就別室自經死

韓氏張文昌妻子也授生二歲而文昌歿韓守節申酉之
變亂兵四起大掠臯邑見韓色美挾之馬上行韓大呼
且罵嚙賊臂倒撞馬下賊大恚兵又交加顛腦迸裂而
死

陳氏白蒲吳棻妻乙酉兵亂赴水不辱死

錢氏豐利場庠生馬文運妻時值明季亂民煽聚劫掠文
運謀於錢欲避他所錢曰我能往賊亦能往不如無出
運強之行錢挾利及自隨賊尋至窺錢少艾逼上馬錢
曰吾頭可斷身不可污也凡三逼三拒之文運奔救賊
怒舉刀斷其指三錢見之泣曰夫以吾故至此吾何生
爲取所挾及自刎死

李家堡草蕩中收麥時有夫婦二人移家就食夫荷擔前
行婦抱子稍後猝遇羣狼欲啖之勢甚皇遽適一人騎
而過憐之呼令上馬婦愧裸體卒不應解衣畀之亦不
可騎者無如何策馬去須臾回望婦與子俱飽狼腹矣
聞者憐之以爲不愧露筋女子云

施氏倪宗美妻崇明人夫婦居如臯佃田正德七年流寇
掠臯邑見施有姿逼污之不從被殺桃樹下

奈氏婦如臯人青年矢節里中貴人售奈氏地爲墓旣售
則盡發其塚勢且及其夫塚婦乃具酒饌延奈族奉姑
上坐婦下拜徧拜族人已乃出匕首置几上曰亡夫朽
骨將不保今日長與姑別俟貴人來我必以頸血濺之

自是挾匕首共起居貴人知不可奪遂已今一塚巍然獨存

國朝

吳氏桑暘谷妻生員九級母李氏九級妻也吳年二十六而寡茹苦事孀姑里黨稱其孝順治二年妖賊煽亂掠桑家村吳抱五歲孫李挈八歲女同竄田間賊搜劫與俱西吳勵聲曰吾苦節三十餘年豈從賊乎身被數十刃孫亦死懷中卒抱持不解李見姑死大慟罵賊以首觸賊及女抱母驚號賊遂斷李頭并傷女一時婢僕死者十餘人無一從賊者內有一婢名玉香奪賊刀墮三指伏覆李氏屍願代幼女死賊相顧駭嘆曰奈何一日殺二烈婦其女與母尸俱仆經一日夜復甦縣令李

樸旌其門

李氏冒起勳妻兵亂起勳中流矢死李以頭觸地流血欲偕死時懷妊將媿姑與母泣慰之冀得生男存起勳後越念餘日舉一女卽自經死年二十一族子冒藩得氏遺像於故紙中春坊許嗣隆記其事甚詳爲立後詣有司請

旌之

謝烈婦失其氏居謝家店順治三年亂兵欲犯之奪賊刃刺其女復自刎死逸民吳世弔以詩云古鎮長途隔水鄉避兵無賴損紅妝中林染血星星碧曠野埋骸節節香肯使武夫輕剖腹遂教嬌女早同行於今南國佳

人少大半從軍跨驢

許氏明吏部文選郎李之椿妻順治丁酉之椿被逮拘置許於嘉興元妙觀東菴中聞之椿抗志不食死許日夕長號亦不食卒

朱氏白蒲東鄉人農民張君選妻選死氏年二十六無子晝夜號泣寢柩旁勺水不入口至七日設蔬食哭奠畢欣然進箸曰吾與君偕矣卽扃戶投繯死聞者哀之時康熙壬午秋八月

秦氏孫灼妻康熙三十六年冬夜比鄰火起灼奔救俄赤燄飛入灼室灼母八十雙瞽秦氏出復入抱姑烈焰環身遂焚死邑人周梧岡紀以詩

陳氏漁人孫某妻夫性嗜酒捕魚爲業隣人單五窺氏年少色美常沽酒饋金於其夫欲藉以通氏夫爲道單意氏慟哭以死誓夫挈網夜出氏知不免縫紉衾衣而卧宵深單五排戶入欲逼之氏大呼隣人至單逃去氏遂投繯死年十九歲時康熙四十八年冒葦原紀其事

楊氏李家堡人陳守貴妻雍正五年三月守貴死楊年二十七兒女俱無竭蹶營葬盡鬻什物爲夫清還宿逋鄰里勸之嫁氏泣而謝之執喪百日于夫靈几前投繯死海陵王達士作烈婦吟紀其事

陸氏生員沈某妻歸沈三年夫歿不食死遺命以斬衰殮黃氏年十六歲歸庠生冒守約生女六歲約卒黃理葬具

甫畢遂詣密室自經其女長適仇洪基一年洪基殞撫
遺孤守節五十一年

於氏豐利場劉漢增妻場有土寇至氏方撫二稚子於室
賊突入欲掠去氏厲聲罵賊被斫數段死娣婦唐氏亦
同聲怒罵自刎死分司倪表其一門雙烈

徐烈婦邑北廂傭夫女贅壻于家沉於飲博饕餮不給欲
婦敗節以謀生婦不從壻恒捶之婦受而不怨一夕壻
與其母計將鬻之遠方婦聞其語詰旦乘壻他出遂出
赴水隣里婦女競挽之婦謝曰諸母誠愛我然非知我
者更躍入深處以死

許氏適周某家甚貧夫常出行買徹屋數椽與姑同棲值

六月暴風雨拔木頽垣所居巷僻有戒心姑命甥某宿
於中楹以防夜警中夜甥撥門入房氏驚呼甥遁去氏
叩姑門訴之姑以其呼擾不成寐詈之氏坐終夜泣不
寢明日甥母來省視氏又訴甥母怒其汚子之名斥
之是夜氏密縫衣裙自縊而死

林氏范某妻夫遊蕩不歸累歲獨處撫子女饑寒日甚或
傳言夫客亡諷其改適氏乃以二子寄食外家密縫二
女衣及已衣以繩相繫投東水關下溺死

姜氏字掌珠太學生培基女廩膳生吳世官妻也世官病
亡遺子甫五月姜誓以身殉家人環勸因矢志乳孤三
年終夫喪號慟嘔血父投藥餌輒嗚咽云兒爲泉下人

踐彌留約飲劑何爲絕粒而死

論曰久要不忘平生之言當世官彌留時掌珠約以死從死生亦大矣非尋常約言可比迨三年釋夫服孤免於懷卒踐其言以死真可謂久要不忘者矣

宋氏陳爾貞妻爾貞漁於溪溺死氏慟不欲生繼念遺孤在襁祿誓死守貞鄉鄰謀奪其志不可有沙姓者向爲陳氏傭密糾匪黨夜排闥入擁出昇至其家氏知不能生還強作歡顏曰婚姻大禮必待閉戶櫛沐新粧方稱沙信之呼朋狂飲醉啟戶氏已正襟投繯逝矣後白有司覈其首從皆置之法

闕氏夫農家子也失其姓名夫歿未逾月族人貪其貲謀

嫁之掠以去婦自刎死邑人李宗統賦烈婦行記其事

裴氏如臯人豐利場大使雷司易妾雷死於任氏方青年痛夫歿無依是夜卽於棺側縊死

郭氏韓家套人張志禮妻鄉居貧甚乾隆四年二月志禮適他出強暴單姓瞰婦色美人室欲污之郭氏大哭罵不從自刎死有司置單於法請

旌其門入節孝祠祀焉

薛氏白蒲人郡庠鄒璜妻璜以入試北雍卒於京邸氏聞一勸幾絕緣孤雛弱息相依爲命繼以子女同時痘殤益悲慘自經死年二十五乾隆壬辰春事

夏氏如臯人通州顧琢玉側室琢玉歿未匝月其嫡憐氏

年二旬又無出促之嫁輿將至門氏陽從請入浴更新衣登堂拜辭夫靈隨捧心傾跌死舉家莫解其故尋視厨中鹽滷半鉢則已盡飲矣乾隆壬辰七月三日事
王氏江漢龍妻性嚴毅教子源濤等有法度漢龍卒哭盡哀水漿不入口越夕卒遺命以衰經殮從之乃含
曹姓妾失其氏夫遠遊落魄寄書令改嫁不從吞食繡針死諸生叢黃玉輩歌詩弔之乾隆十一年正月事
袁氏儒童冒玉錡妻錡嗜學病氏禱於神剪左臂肉煎藥飲之不瘳夫歿日夜泣及殯曰吾今得相從地下矣遂不食七日卒

劉氏顧泉鴻妻夫歿時年二十七矢志靡他閱四載夫葬

絕粒而死

以上烈婦凡三十七人

貞女

明義姑張麟孫女麟次子張禮從太祖征安南有功授廣西右衛鎮撫卒子張福北上承襲行至淮安病故其妻劉氏亦病故遺子張輝年方六歲姑時年十五痛兄嫂繼殞誓撫孤姪終不適人事聞旌表建義姑祠命有司春秋祭焉墓碣至今稱義姑塚

賁貞女儒生賁琮女也幼受曹期聘年十六期卒女卧不食者累日踰年有問名者女復卧不食琮喻其意不忍改字期父繡病劇女聞乃大痛泣請視舅疾琮遂送女

至曹氏門甫三日繡卒女哀號累日不食疾發嘔血十餘日歿郡縣上其事旌之

李氏其父擔夫也老而無子母又時出爲人澣衣女年十六獨居茅屋下鄰少年王尚懋晝踰垣強逼之女持及自衛大詈不從懋以及刺之中胸而死王伏法

國朝貞烈女袁氏里民袁書臣女許字繆芳芳歿袁欲奔喪阻於父命夜卽投繯而死年二十九歲康熙四十七年建坊

旌之

周貞女掘港場人許字海門諸生張所行子人經年十六而人經天貞女曰吾雖未爲張氏婦旣許之盟矣義不

可以不弔父母難之堅請乃往旣至撫棺號躄誓以死殉謂父母曰兒不歸矣生張氏婦死張氏鬼也父母度不能回遂留張竭力奉張翁曉夜辟繯凡所以佐甘旨者甚苦邑令聞其事爲式廬贈一硯以堅其志焉翁歿女營葬於海門無闕禮年七十餘顏色蒼古毛髮森挺如刺歿後殯於草廬是歲火延燒比鄰十餘家唯草廬存康熙五十七年

旌之

貞女蘇氏邑文學蘇翊女幼讀書明大義許字理問許其晉子文學許拱未結褵而拱卒氏年十七聞訃欲奔喪父止之翁亦止之氏誓死靡他竟衰經曳杖往撫棺大

勵拜翁姑以從子猶份嗣長齋奉佛足不越閭外雍正
二年建坊

旌

表壽八十有一無疾而逝縣令蔣依錦式其廬贈以詩云
亭亭特生竹結根傍江沱勁節飽霜雪青葱影婆娑上
有孤鳳凰朝夕獨翱翔將子嗚啾啾毛羽漸成章雉臯
有閨秀系出眉山遺字彼太岳裔準擬結連枝未將百
兩迎早爲風雨驚文禽失其耦音響悽以清血淚染麻
衣辭親哭總幃寧惜一身死哀號有所思念夫未了事
俯仰盡茫茫制淚佐滌髓左右奉姑嫜猶子卜爲後恩
勤鞠與撫稍長訓義方慈母兼嚴父一燈勤紡績半照
兒讀書寒更時飲泣語兒常欷歔我自笄垂纓便爲許

家婦未識爾翁面茹蘗甘相守慷慨欲斷鼻靡他矢柏
舟爲承爾翁志遲遲泉下游聞者盡浩歎天地有全人
迄今五十載完樸葆厥真哲嗣紹箕裘嶄然見頭角羣
推貞烈蔭意氣多卓犖芝蘭有異香松柏有清風清風
與異香氤氳達蒼穹

九重

降丹詔如綸復如絲大書表其門璀璨東海涯我曾宰此
邦邑乘苦摧殘有志重哀集幽光闢且殫嗟予遠罷歸
攬此徒激昂景仰發長歌跂彼采風揚

吳貞女父裔昌及笄許字郭維耀子九徵既納幣九徵死
女欲奔喪父難之女泣請適郭視含殮執喪禮爲夫立
後守貞二十四年歿年四十三乾隆二年建坊

旌焉

貞女王氏王德甫女許字陳秉修子以禮年十七聞以禮卒忍淚不語者竟日詢之則以守貞自矢父母親族皆難之女堅志不移遂素服過門恪守婦道貧甚事孀姑以孝姑卒哀毀成疾不能粒食者七十餘日所居破屋半間姑殯在側雖蔬食菜羹必先祭生平不苟言笑人罕見其面乾隆二年與姑蔡氏同

旌

貞女吳氏吳其達女許字冒稼稼病故女聞訃剪髮泣誓堅請赴喪臨櫬一慟幾絕及葬以髮殉焉守貞二十三年得疾垂死呼稼姪語之曰我死宜與汝叔合窆否則

弓瘞無混吳氏瑩語畢口一小簪爲含而終簪稼物也
乾隆七年

旌邑人吳岳峙以詩咏其事云深閨猶未字彤管早傳名不識生前面常吞死後聲毀容爲就義斷髮豈由情翻笑鬚眉者存亡頓易盟

呂貞女汪文瀾聘爲妻未娶在故呂奔喪守貞三十三載
乾隆七年

旌

房貞女父子言受姚天墮聘女年十五未嫁姚亡女請奔喪守貞事姑苦志一十四載年二十八卒乾隆十一年

旌

貞烈女丁氏父我士黃靜立聘爲室未娶而靜立故丁氏
奔喪慟哭幾絕服闋後投繯死乾隆十三年

旌

宋氏父雲從母嚴父故侍孀母守貞不字日夜勤針黹供
母數年無間母染疾割股肉和藥進終不瘳母歿哀哭
甚閱一日自縊生則養歿則殉孝矣哉年二十歲乾隆
五十二年

旌表建坊

沈氏全德女幼通論語孝經性貞靜許字錢善昌未婚善
昌病歿氏聞訃絕粒誓以死從旋奉父命奔喪哀毀幾
絕歸拜父曰兒歸錢終婦道於心乃無愧父曰女歸錢

終婦道余心亦無憾遂苦節自守膏沐不施纂組不御
數十年如一日每取書傳中所載古來烈女節婦事讀
之或終日危坐不一言其端莊如此擇族猶子文鼎爲
嗣卒年六十八乾隆五十六年請

旌建坊

貞女史氏史書經女生而端莊性極孝以父母無子終身
不嫁父母相繼卒哀慟成疾垂死強起持一盂粥呼父
母曰兒來扶汝矣一慟而絕縣令丁元正聞其事請

旌建坊孫公鋪

陳烈女潘涇人丙戌亂兵掠之不辱躍水死見吳世式詩
烈女周氏名嘉瑀泰州生員周楷之次女襁褓中許字吳

鴻錦未娶鴻錦年十七歲病歿氏年十六聞喪奔赴抱棺泣血誓以身殉旋因勸慰勉作未亡人以女子身代未面之夫事親得翁姑歡五年却膏沐見親戚婦女無笑容里黨以木人稱之乾隆十一年二月間歸寧有鄰母訛言某欲問名氏聞面色如土捶胸裂背背人飲冷水數甌卧床絕飲食不起姑往探問瘦骨支離強起一拜抱姑痛哭淚盡繼之以血曰兒頭可斷志不可奪也三月初七日卒時年二十一歲論曰曾聞有斷頭將軍無降將軍烈士當如此不謂闈幄中未婚女子竟有頭可斷志不可奪者豈尋常從一而終可比哉烈矣

孫貞女幼許字蔣守貴蔣疾孫請探病越三日蔣亡氏哀痛絕粒爲夫立後七十三歲卒守貞四十八年

余貞女父思理許字儒童汪德竣竣讀書能文康熙己亥府試拔第一院試輒躓抑鬱成疾卒余聞之泣告父母曰女已許字汪生生今病且死義無獨活卽投下階母抱之女痛哭曰若乘汪生未殮見一面代汪生奉公姑卽可不死父母見其決烈從之至憑尸哭竣目已瞑復開視逾時氣絕女拜公姑畢哀毀衰麻無不盡禮日夕侍姑左右躬操井臼勞瘁不辭而律身嚴密雖盛暑未嘗服絺綌計貞女奔喪時年二十三歲至乾隆十五年五十三歲守貞經三十年

趙貞女父廷英幼字朱斌斌死請奔喪其母止生此女憐而阻之斌父亦阻之女志終不可奪往守夫柩請於翁姑爲斌立嗣逾歲以悲哀成疾卒

洪氏郭定所聘之妻十五歲守貞計守五十三年

鄭姑麗江大使鄭大位女父宦滇南母范氏病不起含飯之頃抱尸哭吐血數升哀毀骨立死邑人范捷爲作孝女行

馬氏名秀貞民人馬林周女父歿母孀居無子矢志不嫁日勤針黹養母母病手和湯藥親嘗以進歿則喪葬如禮葬母後廬墓側蓬首垢面不輕與人言艱窶甚憐之者有饋遺堅拒不受寧甘凍餓以死乾隆五十三年歿

於墓次時年六十歲氏生平舉止端嚴慎重名義其貞且孝根于天性始終不渝洵可傳已

沈氏學成女母蔡有兩弟皆幼嘉慶三年十二月家遭回祿氏同兩弱弟宿母房見火勢飛騰四面撲入從火光中力挾兩弟出得不死母老驚悸不能動氏復冒火入室救母火熾甚欲出不能與母俱死火滅後灰燼中猶見氏屍雙手作抱母狀以十七歲穉弱女子不避烈火救兩幼弟復救老母母不得救遂以身殉真氣瀰漫動天地感鬼神闔閭中死而不死者也

陳氏廷簡女許字朱繩武未娶繩武年十九病疽亡氏年亦十九聞訃痛哭乘隙投縵家人急救得不死氏遂絕

食越數日歿姑丁氏苦節多年哀氏未婚從夫而死命與夫繩武合葬並立逢春爲其後焉

論曰投繯志在必死假令死於投繯猶曰慷慨以赴也迨至救而得甦閱數日終不食以死庶幾從容就義者歟難矣

吳氏生員東川女許字劉未婚劉病歿氏謂義當從一固請往夫家喪葬如儀以婦代子事翁姑盡孝道爲夫立後教養備至今三十餘年矣

許氏名松靜候選主簿芳女也幼讀女論語孝經明孝道年十餘歲父患血症女割左臂肉和藥以進病稍愈家人不知其割肉也未卽調治血流不止身遂羸弱後父

歿女復哀毀以辱質佐媼母理喪事不逾年卒同里程化鵬題其像有急曾剜肉之句

黃氏名萃芙蓉莊女許字廣東東安縣中堂司巡檢吳顯純子歸有期蓉莊送女過粵東病篤萃英割股和藥以進終不起英亦病父卒哭甚哀嘔血越四日尋卒以身殉親可謂孝矣

歐陽氏豐利場歐陽汝玉女許字吳未婚吳遠遊不歸父有三子相繼亡立姪雲章爲嗣尋亦卒氏遂矢志養親日勤女紅供衣食數十年不懈及父母喪葬畢年已老爲處女終

冒氏農民冒有貴長女十六歲母歿十八歲父又歿僅遺

田四畝一弟兩妹皆幼氏矢志不字紡績耕耘朝夕作苦爲父母營葬具爲弟妹畢婚嫁年逾六十猶晝鋤夜機如故村人稱曰老姑

張氏車馬湖吳玉潤妻夫天閻而痴愚氏事翁姑孝閉戶食貧雖至親不得數見娣姒間有以微言諷者氏正色曰婦人一天耳終身未嘗一語輕其夫

陸氏蘇州人許字白蒲姜禮門未嫁聞禮門訃卽跪告母率婢渡江奔喪次遂弗歸日對遺影飲食必祝誓終身伴焉

陳氏幼許字吳鐔鐔卒氏矢志守貞父密以字人嫁有期女尚未之知也使其母給往外家及入門則新婚者之

居女乃大慟卽夕自經帷中

貞女趙氏獻奎女許字馬塘鄧紉年二十一未嫁夫病故慟不欲生卽奔喪次誓死守貞事翁姑克盡孝道終身如一日撫嗣子佑成立

樊貞女馬塘樊榮安之女也許字趙鼎瑜年十六聞夫墮水死泣告父母奔喪次慟哭幾絕翁姑憐其少勸之歸氏泣曰是兒家也去此安歸翁姑不忍強之遂畱焉以婦道兼子職生奉菽水死營喪葬拮据盡禮立嗣子趙煌年六十一歲卒守貞四十五年

貞女張氏許字黃飲周飲周病歿氏聞訃奔喪盡哀執婦道事翁姑惟謹家貧竭力奉養三十一年

如皋縣志 卷十八
賁氏許字高大器未婚高歿矢志守貞有富家子強委禽焉氏以刀劃面血濡衣袂又自抉其目幾死自是無敢問名者守貞四十年

陳氏陳熙宗之女許字翰林史鳴臯次子發榮蔡踔厲文壇名重庠序清癯力學早卒氏時年二十四聞訃悲不欲生旋奔喪矢志完貞事姑曲盡孝道撫嗣子紹曾成立守貞三十六年

貞女陳氏父掄元許字宗鶴齡齡以療疾亡氏年二十欲奔喪父母難之泣以死請乃命往一慟幾絕家綦貧立嗣子邦寧患痘卒氏勤女紅佐饗殮奉舅姑得歡心及歿喪葬竭心力無失禮守貞三十一年

吳氏生員吳育才女幼喪母隨姊事父知大義許字劉奉峩年二十有一未嫁夫亡奔喪次哭泣盡哀奉姑以孝稱立姪景莊爲嗣教誨成立守貞三十九年

張氏張定邦女年十三母病割股和藥以進父病又然及父母相繼歿泣血三年終身不字衣布服食粗糲足不出戶庭鄉里推爲貞孝年五十三歲

貞女王氏芝亭女以親老無子願終身事親矢志不字親疾進湯藥必嘗禱於神願減齡以代父母先後歿哀感行人立從弟嗣父後鄉里稱貞孝年七十歲

貞女薛氏薛明廷女名蘭芬幼讀書能詩父病割股肉進父病立愈時年十六矢志不字終身事親至二十七歲

病歿作絕命詩一首猶恨不能終事父母云

季氏名繡鸞父母早喪撫弟近仁成立卒年六十九終身未字同室妹季氏貞孝亦如其姊奉養父母堅志不字年六十五歲

季氏名自貞以善女也矢志終身奉父母不肯字人人勸之輒不應惟日侍雙親供衣食承色笑以爲歡卒年二十有九孝本性成不易得也

馬貞女曹橋人父母無子女願不嫁養親親歿廬墓二十四年克完貞白至七十三而終

張氏天衡女明敏多才通書史能文年將及笄父母欲許聘氏以兄久出不歸家無次男奉父母決志不字終身

養親親度不能奪其志遂聽之日勤女紅獲資供養無缺及親歿喪葬皆盡禮善岐黃閨閣有病者賴醫治里黨中女子奉爲師多從學受經暇時靜坐垂簾嗒然如槁木現年八十有五

蔡氏許字王彭高未娶彭高歿氏年十八歲聞喪奔赴哭盡哀矢志靡他婦代子職事舅得純以孝謹稱舅病奉湯藥必嘗以進舅歿無次子請親族立猶子愿爲子治喪葬追愿生子繼宗立爲已子以承夫後艱苦備嘗二十餘載嘉慶六年卒

曹氏國學生居榮女許字洪成業夫力學早逝聞訃絕水漿三日繼以舅姑年邁願歸洪守志父難之氏以死誓

時年二十二守貞六十年壽八十二歲終

石氏監生瑞麟女許字陳尙友年十九聞夫歿卽誓死孀

母金氏力勸之長齋繡佛現守貞三十年

陸氏受陳某聘陳歿女矢志居母家守貞以針黹易食里

閨無不憫其苦志壽七十一終

陳氏名福貞自求女許劉某爲妻年二十二劉歿矢志靡

他在母家守貞二十八年

安氏寄居掘港都閩安定國女許字王銘銘歿女聞訃奔

喪事翁姑如父母自十九歲守貞三十餘年

陳氏許字郁某年十八郁歿女聞訃奔喪嗣族子承先靜

修守志七十歲終守貞五十二年

章氏增生葵士女許字吳一駒吳卒女年十八截髮奔喪

守貞六十餘載

孫氏庠生在山女年十九受戴士廉聘戴歿氏奔喪守貞

善事舅姑閱四十九年卒

章氏幼受湯張書聘年十九張書病瘵卒氏聞大慟欲往

父母力阻之氏誓以必死且給以卽回始克獲命至則

改服衰絰而出謂送者曰爾歸告父母兒不返矣氏在

夫家茹荼飲冰跣步不苟非節朔不歸寧立子傑以繼

夫後守志二十一年而卒

貞女朱氏國學以信女許字文學石經傳子季麟季麟年

十八痘殤女年十七聞之悲泣欲奔喪父母止之卽不

如臯縣志卷十八
欲生日夜痛哭抑鬱成疾絕粒數日而亡里人哀之爲
合塚勒石以誌貞烈

環貞女居邑之西南鄉幼聰慧父成玉授以孝經諸書卽
憬然有悟父母爲之擇配輒不樂年十五母何病革醫
藥罔效女夜禱於庭以剪刀割左肱血淋漓濺地父見
之驚持而泣和藥以進母病旋愈自是矢志事親終身
不字父歿女哀慟不欲生母勸乃止遂偕兄弟事邁母
不離閨闈至今五十餘年如一日可謂貞孝兩全者矣

如臯縣志卷十八終

如臯縣志卷十九

列女傳二 節孝

貞壽

節孝

明顧氏安定鄉朱漢雲妻幼聰慧善事父母及嫁事舅姑
如事父母年二十八夫喪無所出且甚貧事舅姑愈謹
舅姑諭之曰而夫負若自爲計顧曰生死命也夫不得
終事父母婦尚忍負舅姑乎終不嫁洪武十年有司奏
旌其門

許氏西廂石潤妻性婉嫻年二十四而寡無舅姑獨處撫
遺腹子瑜或勸之他適許艷然曰撫遺孤延石一綫是
天不忍絕石嗣也吾敢有二志耶瑜竟藉以成立天順

初詔旌之

章氏赤岸鄉許漢妻適許未幾有娠方五月而漢物時章二十歲遺腹生男名雲龍撫之長娶石氏七閱月雲龍復物石氏年甫十六亦苦節奉姑姑婦兩孀相依以老里稱雙節許家

許氏德化令許穢女諸生張銳妻適銳八月而寡許時年二十二撫遺腹子鳳翔既娶婦生一女而鳳翔夭婦尋亦天許乃依母家母家又落孫女長適殷貴依之而殷貧甚茹荼飲藥六十餘年縣嘗給以米布年八十七而終苦節甚著

胡氏妙惠鉅野令繼祖之姑也歸邑掾李清舉一女清赴

京道物胡氏年二十七勵操食貧終無異志女適國子生錢茂茂又天乃依鉅野以終守節六十四年年九十有一鉅野有女曰守貞歸章植生一女年二十二而寡苦節五十年年踰七十節壽如其大姑焉

石氏淑靜胡柱妻柱患癘石事之沒身未嘗覺其穢柱既卒誓死守亦未嘗以無子搖其志也莊事舅姑舅姑稱善咸躋八袞喜曰吾喜偕老尤喜得節孝婦卒年六十有一

石氏東廂張壘妻壘母陳中歲孀居石歸壘年十八未有子而壘物洗妝撻戶勵節事姑椎布操作未嘗告勞撫羣從子及從孫如已出孀居五十八載卒年七十有六

許氏沿海鄉叢梓妻二十而寡遺孤伍方在襁褓父母欲奪其節則抱伍號慟誓以死親不能奪伍長爲娶婦舉兩子而伍又切許再撫兩孫至成立里黨矜其苦節云殷氏雙店殷琇女陳廷貴妻舉二子後廷貴溺一娼遂別居家亦漸落亡何廷貴死殷年二十七家人欲更嫁之殷抱夫木主携二子而依其尤氏妹居焉嘉靖中倭至掠二子及殷殷牽倭衣頭搶地請代二子死倭拈土寘刀頭向天若矢不殺意竟掠二子去殷數日不食泣盡繼以血會倭敗二子得生還殷七十餘卒

王氏安定鄉盧果妻二十而寡家徒四壁立撫遺孤足不踰閩者五十年會登七十縣令仇炅躬造廬而旌之給

以衣帛且褒以詩

陳氏諸生劉待時妻待時天無子稍有家陳纔二十歲以從子應鸞嗣應鸞長而蕩其家流落以死陳不以顛沛易其操又依其從子應鵬而應鵬亦貧以十指餬其口至七十餘卒

陳氏夏輔妻年十七歸輔居六年而寡子或纔四歲家貧矢志撫孤執女紅行費課或學或旣補諸生輒高等且及貢陳猶勉慰之攻苦自若六十年如一日或賣志先母亡陳復撫其子又數歲卒年八十二

桑氏豐利桑大定女正德間適同里吳柏年十九而柏亡時有娠五月舅姑老且孱薄有貴產族人睥睨欲圖嫁

之桑峻拒曰舅姑在堂孕在腹妾何之越半載生子軒族人故疑而索觀桑抱示之曰男也自後不令族人見逮長爲娶婦生五孫而軒復物桑以王母課諸孫耕讀各俾就業年八十有二萬歷初卒

劉氏白蒲劉慶女十八歸吳崇仁二年舉一子名正華閱六月而崇仁物又一年舅亦物謀奪其志者沓至不爲動乃抱子徙城居去田廬五十里一婢梅花侍糗糒不時給嘗命婢貸米于所親會大雨傾跌泥中徒手歸劉曰幸有乳啖兒吾自甘枵腹耳勵冰操四十餘載卒課其子爲名士歿時六十有六矣

朱氏芹湖朱興周女許聘西廂章日新及笄而章病癘腥

穢不可近兩家父母相議解盟女曰吾生受章聘沒歸章穴豈以惡疾棄之父母憐其志卒以歸章侍疾及期月爲泮廁踰無厭章死女尋亦物年纔十有九邑人哀之

高宜人揚州府人邗州守宗傳妻贈金吾大將軍高爵女也母鄔氏亦以節著傳年踰五十失偶擇配於郡得高氏年二十三矣旣嬪椎布操作克勤克儉事姑以孝聞隨仕邗州歸傳疾卒高年二十九子然一身執婦節者四十年教子孫入庠序世業寔昌

叢氏范源妻全茗州別駕希曾母也氏幼習書史能文父祖咸愛之十八歲歸源源嗜學攻苦得消渴疾夏月時

時啜瓜汁歿後氏終身不食瓜徙於村居辛苦操作事
耄舅撫藐孤守節六十餘年希曾旣長歷仕判廣西全
茗歸曾孫十三人端士至戶部員外郎永育崇祀鄉賢
朱氏吳波禹繼妻也年十六歸波禹僅二月而寡波禹先
娶于冒生子方七歲名綦仲閱五載氏歸寧其父母語
之曰吳氏子不絕如綫又非爾出何自苦乃爾朱正色
曰夫死妻守分也何苦之有且子必已出而後母之若
亡夫何子是不告父母乘一小車歸率兩小婢紡績夜
課兒讀書柩側戶十餘日一啟壟鹽自甘閱十年乃出
紡績之餘爲子議婚娶爲夫營葬事綦仲生三子無何
綦仲復卒撫諸孫亦如其子朱壽七十有八無疾而逝

朱之孫三開宗其一也與曾孫兩俱爲名諸生

張氏安肅丞藻之妹適廩生石京京坳時氏年二十有六
無子以從子成章嗣親授句讀備極苦心及成章爲諸
生額手自慶曰亡夫青箱有託吾無憾矣遂委家政朝
夕誦經默坐而已卒年六十

蔣氏省祭蔣謨女諸生許汝詔妻年十七歸汝詔閱十年
汝詔以病卒氏痛絕不欲生已復自念姑老子幼且忍
須臾毋死乃代子職以鍼黹給饗殮值歲游饑鬻珥以
炊又糲糧惟黍姑不能甘氏每枵腹竟日積黍易米以
奉姑終不令姑知也孤稍長和熊課讀次子文燃充博
士弟子員末年漸臻蔗境而文燃不祿氏因傷悼疽發

于背少子文炳口自吮之燃肌醮天願促齡以代母病旋愈年逾耄耄以壽終臺使監司皆旌表其閭曰一門節孝崇禎庚午賜坊後母祀節孝祠子祀忠孝祠

張氏張之恩女及笄歸秦承業業之高大父爲侍御諱璣永樂間稱名臣承業病張省衣侍卧起旬月不衰迨業亡張年二十有五遺孤應祥纔七月忍死毀容矢志撫孤遺產故稍豐族人思利所有謀奪其志至生端構訟張堅操愈勵備嘗慘悴而家遂替僅餘田十四畝日從事女紅以佐養殮猶時潔滌瀧奉舅姑歡已與應祥藜藿自甘晏如也應祥體母志多所締創而家復振然其攻苦操作之思至老彌篤冰心雪骨六十餘年如一日

至

國朝順治十年有司申請建坊旌節表閭年九十有三以壽終

吳氏蔣一陽妻年十七歸一陽甫二歲方娠而一陽物再閏月曾王姑及王舅相繼物氏鬻產半舉三喪存其半奉姑饋粥幸生男值歲饑盜入其室氏擁姑抱孤訴艱苦狀盜爲感泣去未幾姑卒居墟莽間鬼火夜青且漸逼氏語鬼曰吾初心益勵死不易也鬼輒哭有聲自茲遂絕旣服闋族克人利其產謀奪其志誣訟之旋得白慮傷其孤遷學宮傍擇學行俱優者冒海與締姻藉以教其子脩脯不給績維佐之卒成其子鳴驚爲諸生有

聲譽序間縣令李衷純請于學臺孫按臺崔賚之粟帛旌其門曰完節可風

趙氏別駕之卿女國子生錢懋元繼妻也懋元爲京兆藻冢子母許宜人先卒後母李不以禮遇趙趙莊事之未嘗少弛敬也舉子纔數歲而懋元病疽卒趙號慟以頭搶地顧視藐孤在抱則又忍涕強起經紀喪事自是日夕伴靈寢丸熊課子未幾兒又歿急謀之叔體元立嗣以延宗祀而叔與族人謀且叵測趙聞卽閉閣毀容以家產三之二歸於叔與族人而存所創之一以撫嗣子自以所居宅爲祠以祀京兆公知縣李衷純嘉其志亟旌之上其事於臺省表其閭

丁氏貢生冒起年妻起年夙負才名以力學卒氏年十九毀容自矢布蔬終身奉養尊嫜五十年克盡婦道教子寰珍寰璋皆爲名諸生孫勗復親爲督課俾得弱冠入邑校計守節七十一年前令李文秀旌之曰栢節椿齡馬氏憲副昌起宗之配馬氏自述齋侍御後制科代興其子女悉嫻內則曉大義氏年十七歸憲副時祖姑沙尚在氏將順曲得其歡沙病革氏衣不解帶爲之調湯藥濯厠踰百餘日不倦事舅姑亦如其事祖姑人咸稱孝婦憲副由行人遷南考功出爲兗西高肇衡永道所至皆廉潔氏實佐理之及監左寧南軍於襄陽時獻賊張甚襄漢陷危或諷之以病辭氏不可曰君素以忠貞自

矢奈何爲苟免計乎叱馭行至軍殫力王事踰年得請告歸氏相與撫松採藥終其身及憲副歿撫育幼子倍加愛養俾之成立年八十有七無疾而逝子襄奉母不仕極盡純孝人咸仰其母訓焉

劉氏憲副昌起宗側室年十六歸起宗宗卒隨大婦馬恭人苦節三十年子一衰裔皆有文名

陳氏許邦僂妻明忠烈陳輔堯妹也孀居三十年栢舟自矢課子義方有陶母風

王氏太學生胡應薦妻薦工舉子業有聲南雍刻苦致疾王割股和羹以進卒不起王年甫二十七忍死撫孤形銷骨立事姑極孝縣尹李丹衷王岫生悉旌之子邦熙

邦棟皆早年遊泮邦棟別有傳

陳氏適王熙熙死陳尚少念姑孀子幼因以不死母家因其貧欲奪陳節陳終身不歸寧盜竊陳衣憐其苦節夜復還之子以誠後舉鄉耆知縣王珍錫上之臺省以聞於朝旌其節云

馬氏諸生許字妻宇早卒氏年十九生子女各一女三齡子二齡氏堅守歷四十九年卒子杖邑庠生

國朝

張氏太學生顧文徵妻年十八適文徵甫踰年文徵歿痛夫無子泣告族長雙立二子以承夫祀守節四十六年屏絕鉛華長齋繡佛教子盡義方之訓長子天印成邑庠生前縣尹王岫生旌以貞烈

許氏吏部忠愍公許直姊歸府庠石伯儒之鼎閩範端肅
有大家風之鼎早卒無子許哀毀瀕于死立嗣子與立
僅五齡熒熒幼弱撫育如已出風雨孤燈課子夜讀孀
居四十一年才節兼全宗黨稱之子與立貢生候選州
佐

沈氏鄉飲賓沈子爵女年十八歸儒生章日文文幼瘠嗜
學晝夜攻苦遂成怯疾卒沈年二十有二吞聲飲泣力
撫幼孤琪未幾舅姑相繼殞琪尚未成立家故貧喪葬
事皆沈自經營琪長娶王氏生孫照無何王又卒沈復
以撫子者撫孫茹茶飲藥七十餘年幸琪孝謹善生計
晚年奉甘旨無缺沈年九十有八卒時琪年已望八率

曾孫凡四世執母喪有司上其事循

恩例得建坊表從祀烈女

謝氏太學生天寵女年十八適石季儒之冕冕讀書致疾
謝曲爲調護疾篤刲股以進閱八年冕卒謝膏沐不施
一切喜慶之禮槩不與持家嚴肅三尺之童不入內雖
溽暑子姓不衣冠不見再從子姓多有未識其面者當
兵燹竄伏猶日課兩孤兒誦讀不輟以故其子與賢與
德俱得爲名諸生上舍辛酉秋孫爲崧膺鄉薦親知共
稱慶猶閉門閭坐不忍聞管絃聲有司舉其節大中丞
以狀

聞

黃氏邑增生宗宏祚妻諸生祧母也幼貞靜不苟言笑及
 笄歸宏祚事公姑以孝聞宏祚因父喪哀毀致疾遂不
 起氏家貧甚勤紡績蠶桑事孀孤下撫二子五十
 五年艱苦備嘗未有怨色卒年八十有三子祧時年六
 十有三天性篤孝寢苦枕塊旦暮淚涔涔下未嘗乾也
 周氏生員徐正誼妻歸徐未及三載年甫十九誼卒遺孤
 文思生纔數月氏堅貞自矢辛勤操作杼聲常達旦子
 就外傳歸必課其書業訓子成立名列膠庠苦節四十
 七年前縣尹高瑚趙宏化皆給匾旌其門康熙五十八
 年

旌

錢氏淑靜邑諸生丁月世妻未嫁割股愈父疾適用世食
 貧居賤操井臼事舅姑孝養備至舅姑與用世相繼殞
 歿錢茹荼勵節惟老僕丁順債舂負芻以給順有妻張
 氏者辭其夫朝夕依主母二十年後錢亦卒四柩未舉
 張驚所生女得十餘金以營葬葬甫七日張卒里人義
 而哀之為葬於主母之塋
 徐氏太學叢魁林妻運判叢中桂母也夙嫻內則性尤純
 孝內外族戚無間言姑病危篤徐夜祝天願以身代割
 左臂和羹以進疾遂霍然起是夜夢神語曰汝媳純孝
 賜以一子顯大其門戶明年果生桂桂僅九歲徐病卒
 康熙十九年

誥封徐爲安人

李氏生員昌夢相妻年十七歸夢相夢相病李剝股和羹願身代年二十六而寡撫孤茹苦五十八年如一日焉其子起瑞起蒙皆教以成名起瑞需次州同起蒙登鄉科余中丞奏請得邀

旌表

吳氏年二十歸顧贊臺方五載贊臺殞家貧無子立嫡姪所養爲嗣撫養教誨如已出及成立爲邑諸生所養又逝媳陸氏年二十亦矢志自守課子力學以紡績佐誦讀子鳳起鳳彩皆采芹食餼康熙二十二年縣尹申請各憲具題建坊褒其兩代苦節

劉氏吳世家妻世家苦志下帷數奇不售抑鬱以歿生子尚襁褓劉哭之哀欲以身殉繼念孤兒無母何恃堂上奉養無人乃強自存活治家政綢繆外侮歷妻風苦雨五十年教其子維翰成立名噪膠庠孝稱閭里孫女適顧生汝爲夫資志早歿女方廿齡矢栢舟節論者謂其不愧家教云別有傳

許氏陳櫻妻事姑盡孝內外無間言櫻早逝子元祀方四歲許飲冰茹蘗誓死靡他躬親織紉課子讀書風雨晦明書聲不絕元祀得食餼邑庠氏壽九十縣尹暨郡有司咸額匾旌之

許氏邑庠生顧士掄妻吏部員外忠愍公直女也通書史

天性純篤母冒疾氏方齧戲顛天求代及笄適士掄已抱疴氏親湯藥滌廁踰掄病日益篤踰月而沒終喪氏泣拜告舅姑曰夫手足四人無子者三惟長伯子二今媳夫死請為夫立後得士俊子謙嗣焉躬親鞠育教以義方甲申之變忠愍公殉國氏聞訃一慟而仆遂得疾疾革召謙立牀下命之曰父死忠吾死孝兒幸成立余無憾矣卒年四十二

畢氏胡君輔妻十七歸君輔不數年君輔死畢年甫二十家貧無子族叔牧長生子彌月畢請立為嗣奉姑至孝撫子極慈年六十餘卒子名際可奉母訓力學敦行有聲庠序間

吳氏秦信妻年二十八信死遺孤應登尚在襁褓吳一擲幾絕以撫孤故不死教其子成立登性孝吳病刲股奉親病立起未幾登死媳王氏年二十七孫寬纔十齡王上奉孀姑下撫幼子辛勤備至寬長娶紀氏未三年而寬又死幸遺嗣克隆三代共撫之一門之內冷逾冰霜克隆稍長造就外傳能讀書補博士弟子員吳年八十一卒王年七十有二紀年亦五十六矣一門三節良可悲亦可風也

曹氏叢斗垣妻垣早卒子爾馨僅六歲曹年二十五砥節撫孤比長娶楊氏年十八婚未一載而馨死楊有娠三月泣禱于夫之靈曰如不應斬祀得生男幸撫之否則

有死而已果生男後其子爲叢族所匿十餘年楊日夜悲號目遂雙瞽子得歸依其母成婚之日雙目忽明亦事之最奇者

景氏邵士雍妻景善病歸雍三年恐艱于生育爲雍納妾雍納妾生男卽孝子邵維翰也翰三歲而雍死景事翁姑以孝撫翰以慈翰亦謹事嫡母歷四十年前令李振奇表其門曰節孝

石氏儒士許登明妻登明卒姑年七十有五六子一女石仰事俯育艱苦萬狀四十年如一日督學道邵嘉給匾表之

陸氏丁守綱妻守綱夭氏年十七父母隣其青年無子女

勸令改適氏遂斷髮以死誓親不能奪苦志自守六十餘年蓋未嘗無故下堂帷也知縣陳秉彜上其事巡按御史給米布表之年八十四歲卒

陳氏冒起紳妻起紳早歿陳矢志撫孤備嘗艱苦教子兆禧迄於成立飲冰茹蘗者四十五年

叢氏年十六歸邑增生石研踰年研卒無子母家欲令改適叢截髮矢無二以姪生輝嗣輝死叢食不飽衣不完艱苦備嘗始終一節垂六十年張氏邑廩生石生色妻生色卒張年二十四子峨甫周歲熒熒發婦生養死葬嫁女婚男守節五十餘年又盧氏者叅軍石聯雲妻明經生潤庠生生澤母也於叢爲嫡姆於張爲伯姑早年

守節淑順慈仁卒年七十有六此三婦者松貞栢壽出自一家故並記之

蘇氏司李冒襄配嘉穗丹書母也氏既歸司李善事舅憲副公及姑馬恭人猶得事王舅奉直公及祖姑宗宜人皆恭謹能得其歡心氏先舉一子名充馬恭人病篤襄禱于神請以幼子代無何充殤馬恭人病愈氏未敢以哭子之聲聞于姑人稱其孝司李公負清流之望喜結交天下之豪俊又性好施予兩次賑荒苦不給則脫簪珥以助之無怨色其賢孝如此夙有痰疾足不良于行卒之日猶嬰臂馬恭人前問寢膳忽痰發仆墜下遂卒子嘉穗丹書皆名聞當世益得蘇孺人之教為多焉

張氏邑廩生吳從禮妻垂髫事親以孝聞及笄歸從禮二十五而喪夫孤子之儒甫周歲張備極艱苦撫孺成人姑病張目不交睫衣不解帶病日益篤醫藥不效張剜股以進姑病遂愈人頌其孝焉年七十五歲終迄今吳氏家庭孝友嫻睦其錫類遠矣

王氏顧彥芳妻彥芳早逝王甫二十七歲矢志堅貞哀毀骨立課子瑤駟五夜不輟丸熊五十二年駟得蜚聲上舍考授州佐王乃少自慰云

陸氏鄧毓吾妻毓吾早卒陸年二十六子兆瑞方二歲舅姑俱六十餘陸茹荼自甘備極儉素勤奉甘旨無闕禮教子盡義方每以勿墜前業為誡孫曾四世入泮者二

人前御史馬賜布穀學使張給匾額卹獎其家

冒氏日新女年十八歸儒生張嘉賓賓嗜讀冒代奉尊嫜

以孝聞賓疾冒割股救之尋愈復三年而賓卒未有子

嗣惟一女長適高巖計冒歸張七載守節歷四十年

吳氏太學薛國佐妻國佐亡吳年二十七守節以終二子

清潤皆諸生孫彬歲貢

仇氏王觀訓妻夫故氏年二十四守節六十二年康熙五

十二年

旌

劉氏會元劉烝女監生石為城妻夫疾剜臂肉和羹進之

竟卒無子立姪文美嗣訓之成立為諸生隸名仕籍中

旌

皆母教也氏自律嚴甚不苟言笑五尺之童不入內雖
溽暑家人非冠帶不敢進無故足不出中門冰霜之操
老而彌茂守節三十三年康熙五十二年

許氏里民賈天錫妻夫歿氏年二十七遺孤二曰鳳曰麟

翁姑老且病家甚貧為人絡絲以給養姑疾一手抱孤

兒一手濯廁煖焙而易之如是者百日姑死棺不滿三

寸氏哭之慟曰何異棄屍矣翁又死泣訴母族得少貲

乃克斂復晝夜絡絲積其資數年盡償之嘗絕糧取釜

易餅餐食之既盡兩日不得食閉戶卧翁故僕見之痛

哭曰脫餓死我主絕後矣解敝袍出質市釜及米數升

炊而進之得不死鳳既長能自力食且孝懼無以表母
節日夜哀號隣人憐其志詣有司請之獲

旌建坊

陳氏文學沈宗姬妻幼讀書明大義十八歸宗姬宗姬弱
齡遊庠序緣刻苦致病不起結禱僅三月耳氏勺飲不
入口誓相從地下既而念夫無嗣不敢死時宗姬兄宗
聘祇一男於義未應立八年後誕全德婦喜曰今無負
初志矣當禳祿卽告廟行立後禮撫摩教誨俾成立著
聲士林間先是嗣未立氏熒熒子立事舅姑惟謹孝養
不衰姑邁疾親奉湯藥刲股以進少甦踰數月姑卒哀
毀不能自存全德既受室猶率婦織紉事砧杵布衣蔬

食終身無笑容雍正二年有司上其事

旌之守節五十一年卒女孫許字錢善昌未及御輪錢亡女

矢志奔喪守貞錢宅王母之餘風猶存見貞女傳

余氏冒益謙妻冒故氏年二十六守節六十餘年雍正二

年

旌

錢氏生員繆雄妻繆故錢年二十七志堅從一誓死靡他

事翁撫孤孝慈兼盡雍正四年

旌子繼昌克承先業鄉里稱之

姜氏鄉飲賓姜聖初女監生陳繼俊妻夫故氏年十八父
母舅姑憐其少勸之他適氏痛哭數日不食嚙一指血

淋漓矢之衆議遂絕上事翁姑問寢視膳靡不周至舅
 姑安焉舅姑相繼卒孤僅髫齡或乘其危而伺之氏力
 持不動有遺券悉焚毀不取償危疑悉釋罔不感愧稱
 其賢守節五十八年備嘗艱苦淚枯傷目遂瞽教子成
 立由庠入太學一堂四世由氏一人延之雍正九年

旌

冒氏生員王廷妻年二十二夫歿奉孀姑鄰家火起氏獨
 抱姑出寢室餘皆不問火竟不延享壽一百一歲守節
 七十九年雍正九年

賜占壽坊

氏有侍女張念主母苦操終身相依不適人七十歲死
 頃氏增廣生朱廷家妻二十七歲夫故翁姑年登耄耋氏

主持家政整齊嚴肅上事下撫克孝克慈子學源焯文
 行兼著一遊巒序一列成均守節五十五載及見諸孫
 以次成立蜚聲膠庠雍正十年

旌表

徐氏邑庠生范疊妻年二十七而寡子天培生甫三日氏
 哀毀骨立三月不櫛沐天培睦而病氏摘項中髮繡大
 士像爲孤兒乞命年四十一卒雍正間天培長請

旌祀貞節祠

叢氏張棣妻吏部主事張祚之仲媳年十九適棣敬事舅
 姑不四載棣歿氏撫八月藐法教養艱辛長就外傳命
 名思永發憤績學爲諸生旣而思永夫婦俱歿一孫在

如皇縣志 卷十九
抱貧苦益甚歷五十年無渝志乾隆元年

旌

陳氏劉元善妻劉卒氏年二十八經理家政內外秩然事姑瞿温涼饑飽得其懽心兩世霜發相依爲命蓋三十餘年焉姑年九十八一日執氏手訣曰新婦事我良苦所極不忘者昔予少子孱且病新婦善承老人意爲邱嫂而以慈翼之後渠夫婦天手遺孤屬新婦迄今撫如已子俾得成立吾知汝後必昌也姑逝氏哀禮備至鄉里稱孝焉子學成醇謹有長者風乾隆元年詣有司請旌之已而斥貲賑江省氏加一命父元善亦獲贈氏壽至九十七歲僉謂氏有餘慶而學成亦克負荷云

石氏戶部員外郎石爲崧女八歲舉動若成人父授以孝經內則句讀輒誦不忘十九適左春坊許嗣隆孫銳爲妻越二年夫卒哀毀骨立數瀕于死遺腹生子潛教之成立先世爲清白吏遺產甚薄氏紡績經營閱十年積貲爲夫卜葬又數年爲孤子姻娶鄉里稱之守節四十五年乾隆元年

旌

江氏國學江漢龍女適儒童許昌祚爲妻夫疾典質奩資百方醫藥衣不解帶者累月夫歿慟不欲生因懷娠冀得子延夫嗣堂上有祖舅姑待養乃忍哀弗死及生女遂撫之數年後夫弟得子乃立爲嗣曲盡劬勞教以大

旌

義嗣子讀書砥行不墮先業守節五十四年乾隆元年

旌

章氏邵永正妻年二十九夫故守節四十六年子彥若孫
搢颺皆教之成立乾隆元年

旌

程氏汪起凡妻二十九歲夫亡守節四十三年子監生汪
璉於乾隆元年報

旌

王氏藍田知縣鄧士英側室鄧故氏年二十七守節三十
二年乾隆元年

旌

陳氏藍田知縣鄧士英側室鄧故氏年二十八守節三十
六年乾隆元年

旌

劉氏州同方欽側室方故氏年二十八守節四十八年乾
隆元年

旌

沈氏薛元薰妻薛故氏年二十七守節三十三年乾隆元
年

叢氏吳方啟妻吳故氏年二十五守節三十三年乾隆元
年

旌

陳氏張公詹妻張故氏年二十九守節三十二年乾隆元年

旌

姜氏冒裘側室冒故氏年二十八守節四十七年乾隆元年

旌

冒氏文學余瑞鯨妻鯨故氏年二十三守節四十年乾隆元年

旌遺腹子鍾岐邑庠生

胡氏劉愈烈妻劉故氏年二十九守節六十一年乾隆元年

旌

沐氏吳茂生妻吳故氏年二十九守節五十七年乾隆元年

旌

徐氏生員史允良妻允良家貧嗜學讀書徐篝燈佐讀夜分不倦允良省試歸得疾不起徐涕泣號痛一子甫七歲聰穎能讀書傾質羸病瘵旋又卒翁姑命他孫嗣之自二十三歲夫亡至六十四歲卒苦節四十一年乾隆元年

旌

趙氏年十八歸州司馬張鶴齡為側室二十八而鶴齡歿
 遺孤懋昭方五歲趙氏率老嫗保護攜持晷刻不離一
 切女工皆停置日事莫重於撫孤他勿恤也孤能言舉
 止皆教之稍長出就外傅既壯孝於親常依依子舍氏
 諭之曰始兒熒熒藐孤托先公之靈得成立且又舉三
 子當及時圖仕進成先公未竟志懋昭乃北遊仕廣西
 永安州牧版輿迎養常以清勤慈惠為訓勉每進食必
 云一勺水皆

君恩一粒米皆民力懋昭居官得賢聲遵母教也及懋昭卒京
 邸趙氏偕百口從粵西歸又教其諸孫老而愈勤卒年
 七十有五乾隆二年

旌子懋昭另有傳

范氏名貞儀貢生高纒妻明經高深之家媳也生而敏淑
 七歲能吟咏女紅之暇潛心經史及笄適纒克佐夫子
 先意承志乃翁有女中顏閔之許未十年姑死夫死翁
 死并庶姑長子死遺幼叔三幼子二熒熒孤子兩世無
 依風雨漂搖有毀巢之慮氏以弱女子身任其責乃能
 拮据捋荼智以防外嚴以肅內喪葬婚嫁措置得宜課
 叔教子皆得入黌序登仕籍以嫂比母以母代父誠無
 忝矣所著愁叢集自言生平之坎坷精誠憂憤躍躍紙
 上令人感歎而欽服焉節孝完人無出其右乾隆二年

旌

何氏建昌通判沙鼎側室年十八歸鼎端靜有儀範通毛詩列女傳諸書隨宦建昌鼎疾祈北斗求代罔效時氏年二十九生子漢儀漢光甫齠齡扶櫬數千里外無失禮歸而教子成立羣自為雙璧焉諸孫方識之無口授經書寒暄罔間皆成名諸生戚里嘖嘖稱之守節三十八年乾隆二年

旌

石氏石為崧女歸文學冒福書福書勤學攻苦嬰疾早卒遺孤泰方三歲氏撫之備極勞苦後泰筮仕平原氏就養二年卒守節三十六年乾隆二年

旌

吳氏生員吳爾琳女劉暹妻結褵六載劉故吳年二十四遺腹生男宏緒家極寒薄以紡績孝養翁姑得其歡教子以義方比長為諸生有文名守節六十七年壽九十一乾隆二年

旌

繆氏生員劉四知妻四知早卒氏年二十八遺孤齡元九歲而亡氏矢志彌堅孤苦伶仃守節五十八年乾隆二年

旌

沈氏葛國珍妻葛故氏年二十四守節三十二年乾隆二年

旌

石氏吳鳳韶妻吳早逝氏二十七歲守節四十九年乾隆二年

旌

沈氏胡家葵妻胡故氏年二十四守節五十四年乾隆二年

旌

楊氏白蒲吳殷宗妻于歸數月夫逝遺腹生子為虹比長娶于宋宋中年又寡矢節繼姑志孝事楊亦如楊之孝事繼姑徐也楊壽至七十卒乾隆二年建坊

旌

周氏儒士顧開妻顧卒氏年二十五守節四十五年乾隆二年

旌

蔣氏葛貽遠妻葛故氏年二十二守節五十三年乾隆二年

旌

趙氏羅聯生妻羅故氏年二十守節六十六年長孫武述早故妻張氏年十九守節符例乾隆二年雙

旌之

謝氏許之甲妻許故氏年二十四守節四十一年乾隆二年

旌

許氏沙鍾壚妻沙故氏守節四十年乾隆二年

旌

蔡氏體乾女幼習孝經女誠諸書及笄歸陳秉修甫五載
秉修歿氏痛不欲生緣遺孤以禮僅五月姑緩死為延
後計鞠育勤勞甫弱冠為聘王德甫女未娶以禮病卒
蔡因一線已絕志在必死時王氏年十七聞訃以守節
自矢素服往婦代子職事姑孝家貧勤針黹謀饘粥養
姑姑得稍慰終餘年王氏力也姑歿疏食菜羹必祭姑
然後食生平不苟言笑人罕見其面卒年六十餘前已
蒙

恩雙旌建坊並祀節孝祠

旌

齊氏龔寧九妻龔故氏年二十八守節四十五年乾隆二
年

旌

胡氏劉文丞妻劉故氏年二十九守節六十四年乾隆二
年

旌

冒氏石堯妻石故氏年二十一守節四十五年乾隆二年

旌

宋氏顧士隆妻顧卒氏年二十四守節三十年乾隆二年

旌 方氏生員方華宇女明崇禎八年適生員吳立駿為妻歲
乙酉夫故氏年二十七時值兵亂保護孀姑幼子流離
困苦相依為命卒教子祺成立孫如升如恒咸遊庠入
太學守節五十八年乾隆三年

旌 沈氏叢中和妻二十四歲守節至八十七歲歿乾隆三年

旌 石氏叢合浦妻二十一歲守節至六十七歲歿乾隆三年

旌 羅氏劉雲紀妻劉故氏年二十三守節二十三年歿乾隆
三年

旌 陳氏劉羽吉妻劉故氏年二十二守節三十四年乾隆三
年

旌 陳氏生員金日省妻金故氏年二十四守節五十七年乾
隆三年

旌 石氏陳以質妻以質歿氏年二十四無子人以年少恐不
能堅守探之氏嚙指出血矢無二舅姑憐其志立麟角
為後撫摩教育極劬勞麟角長為娶婦生孫兆福麟角
死復撫養其孫延師訓誨有文名又以疾卒數十年中

教養子若孫心血幾枯而皆不壽遂悼傷成疾以歿守節五十餘載乾隆三年

旌

章氏趙之連妻趙故氏年二十二守節六十四年乾隆三年

旌

鄒氏冒進功妻冒故氏守節三十七年乾隆三年

旌

周氏顧某妻嗣子健行乾隆三年

旌

陳氏張芹妻張卒氏年二十三守節二十餘年歿乾隆四

旌

陸氏監生奈涵妻奈故氏年二十九守節二十六年歿乾隆四年

旌

吳氏洪國儀妻洪故氏年二十七守節三十八年乾隆四年

旌

劉氏陳秉紹繼室陳故氏年二十九歲撫孤以績有成守節五十四年乾隆四年

旌

旌

朱氏顧某妻守節符例乾隆四年

旌

程氏錢應宿妻明崇禎十七年夫故氏年二十九守節五十五年乾隆五年

旌

孫氏陳君政妻陳故氏年二十二守節六十年乾隆五年

旌

張氏汪尙槐妻汪故氏年二十九守節四十六年乾隆六年

旌

張氏劉鍾俊妻媳石氏劉某妻守節符例均于乾隆六年

旌

劉氏章有年妻章故氏守節五十六年乾隆六年

旌

楊氏章啟蔭妻章故氏守節三十五年乾隆六年

旌

陸氏余光緒妻余故氏年二十七守節三十七年乾隆六年

旌

陳氏金某妻守節符例乾隆六年

吳氏冒甄祖母乾隆七年

旌

程氏劉鶴鳴妻夫故守節符例乾隆八年

旌

繆氏夏永祚妻夫故氏年二十七守節五十六年乾隆八

年

旌

陳氏張一蕙妻張故氏年二十七守節三十八年乾隆八

年

旌

吳氏張一蘅妻張故氏年二十九守節三十九年乾隆八

旌

孫氏朱赤符妻朱故氏年二十八守節三十七年乾隆八

年

旌

葛氏生員夏鼎妻夏故氏年二十八守節三十一年乾隆

八年

旌

朱氏楊旭升妻旭升疾篤朱禱於神剖左股肉和羹以進

血透衣三襲逾歲夫歿氏年二十九守節三十年訓子

廷楹為邑諸生乾隆八年

旌

郭氏薛肇成妻薛故氏年二十歲守節二十九年乾隆九年

旌

章氏馬季良妻馬故氏年二十四守節五十三年乾隆九年

旌

陳氏嚴君錫妻嚴故氏年二十九守節五十一年乾隆九年

旌

孫氏朱幟妻夫故守節符例乾隆九年

旌

平氏秦廷徵妻秦故氏年二十八守節三十四年乾隆十年

旌

單氏余扶輪妻余故氏守節符例乾隆十年

旌

曹氏岔河李夢星妻生子尚綱四歲而夢星卒時曹年二十八宗人利其業懷利及將往刺孤道經土地祠禱之期必殺焉有可卧於祠內聞之往告曹迫計無可匿乃抱孤出戶逆懷及者陽為温語款接之其人慚沮及從袖中墮孤竟獲全丐老無依曹憐而飯之所以報也已

乃寄其孤於戚屬家月入城一視携一葦量其長短驗少長則喜分手輒痛哭失聲守節四十八年迄今子孫多列校序乾隆十一年建坊

旌焉

吳氏黃奉田妻明崇禎四年奉田故氏年二十七矢志全節明季兵亂流離百折撫孤有成茹苦六十一年乾隆十一年曾孫州同知黃嗣緒請

旌建坊乾隆六十年元孫監生景燮重修

余氏李錦標妻李故氏年二十四代盡子職備歷艱辛守節三十一年乾隆十一年

旌

顧氏庠生管正學妻管故氏年二十八守節三十四年乾隆十一年

旌

郝氏蔡雲翔妻蔡故氏年二十九守節三十年乾隆十一年

旌

黃氏紀勝宜妻紀故氏年二十八守節四十一年乾隆十一年

旌

章氏生員曹瑛妻夫故守節符例乾隆十一年

旌

康氏仲淑禮妻仲故氏年二十七守節四十二年乾隆十

旌

徐氏單自發妻單故氏年二十歲守節三十六年乾隆十

旌

劉氏生員吳錫範側室吳故氏守節三十年乾隆十二年

旌

李氏姜掄妻夫故氏年二十三歲守節三十七年乾隆十

旌

石氏丁元弼妻丁故氏年二十歲守節四十年乾隆十三

旌

沈氏馬實生妻馬故氏年二十九歲守節三十四年乾隆

旌

蔣氏冒元一妻冒故氏年二十二守節三十六年乾隆十

旌

吳氏叢國瑄妻叢故氏年二十八守節壽登九十二親見

旌

趙氏吳國祥妻夫故氏年二十九歲守節四十二年乾隆

十三年

旌

鄭氏陳瀚妻陳故守節符例

旌

劉氏馬塘場王理甫妻二十七歲夫故守節四十年

許氏吳大化妻十八歲夫故守節四十二年其媳宗氏吳

夢麒妻亦守節符例其孫媳繆氏吳伯昌妻二十二歲

夫故守節四十一年

冒氏生員叢鄧林妻二十五歲夫故守節四十七年

顧氏掘港場羅士端妻一十七歲夫故守節六十七年

王氏生員范毓芳妻二十六歲夫故守節四十年

冒氏陳應朝妻二十二歲夫故守節五十年

紀氏劉岐生妻十九歲夫故守節五十年

吳氏文學吳五玉女年十八歸顧汝為五載夫亡悲哀盡

禮服闋或以無子諷氏聲色俱厲曰吾徐待繼嗣毋汚

吾耳居常屏鉛華甘澁泊惟奉舅姑不儉其諳於大體

類如此守節二十八年卒年五十有一嗣子紹祖有聲

鬻序孫雲甲子舉人人驥駟皆成進士

宋氏州司馬沙樹德側室嫡范氏疾篤氏剜股和藥以進

遂愈嫡子之投遊庠授室氏欣然部署家務不辭勞動

所生子之捷七歲而孤撫之成立守節四十四年知縣
丁元正以蒼松烈節額旌之

沈氏冒起頰妻十八歲歸起頰三載生子彭年而夫歿氏
年二十二披髮毀面哀感行路苦節撫孤自課誦讀竟
爲名諸生孫藩國學生守節三十餘年

陳氏李茂卿側室李故氏年二十四守節四十九年卒子
庠生文瀾孫廩貢生嘉賓撫孤兩世有成

楊氏生員曹璉碧妻曹故氏年二十二上奉孀姑下撫孤
嬰先是夫病割股姑病又割股守節六十一年卒

劉氏吳允功妻吳故時氏年二十二歷年八十有三臨終
夜夢神語曰守寡之難如鑽鐵環鐵環鑽過受記靈山

何氏洪國禧妻夫故守節五十六年

蘇氏吳錫瑄妻守節五十八年卒年八十六歲

張氏吳日康妻苦節六十五年卒年九十三歲教子亦成
讀書遊泮

石氏宗綬聲妻二十八歲夫歿守節五十五年

冒氏姜佩妻二十九歲夫故守節五十八年

吳氏適生員劉增琦成婚三載劉故氏年十九歲遺腹生
子鍾龍家業蕭條饑寒並迫氏百折不回白首完貞歷
年七十二苦節五十四年

吳氏許琳妻歷年七十四歲苦節五十一年

姜氏章季卿妻二十六歲夫歿守節五十五年前令周鼎

鑑旌其宅

蕭氏童朝斗妻蘭州州判童昌齡之母年二十九歲夫故
守節四十年

張氏丁堰鎮顧滄妻二十二歲夫歿長子三卿尚在襁褓
守節五十五年備嘗艱苦

孫氏顧三卿妻二十八歲夫歿上奉耄姑下撫遺雛守節
五十一年壽七十九歲

謝氏李家堡仲世第妻二十六歲夫歿子邦文甫七歲氏
時方有娠上無舅姑族人將奪志而謀其產氏引刀斷
髮越月次子生懼終不免挈子往泰州依母家棄家產
不顧以女工易食延師訓子俱至成立享年八十有四

曾孫鶴慶由泰州籍中解元成進士

花氏昌嘉禾妻二十四歲夫歿其子廷璧甫二齡氏奉翁
姑至孝勤儉勞瘁教其子廷璧以讀書世其家壽七十
四歲守節五十一年廷璧國學生八十四歲以耆壽終
許氏昌起巖妻二十二歲夫歿守節五十二年子蔭庠生
吳氏冒與立妻二十九歲守節卒年八十歲守節五十一
年

陳氏郭瑤章妻年二十三歲郭故歷年六十五歲守節四
十二年

孫氏唐中興妻年二十八夫故守節四十三載

陳氏胡家瑛妻年二十七夫故守節四十六年

楊氏袁尙銘妻年一十五歲夫故守節四十四年

徐氏朱耀龍妻年十九歲夫故守節四十八載

錢氏張以華妻二十七歲守節卒年六十六歲守節四十

年前周令旌曰節比松筠

鄒氏趙長縉妻二十三歲夫歿守節四十一年

陳氏蘇介臣妻二十八歲夫歿守節四十七年

吳氏沈允珍妻二十九歲夫故守節四十四年邑侯陳旌

曰歲寒筠瑞

許氏馬霖周妻二十九歲夫故守節三十九年

許氏曹孟閻妻孟閻卒氏年二十八歲家貧窶勤針黹事

翁姑撫養其子為婚娶子年未三十歿遺孫國衡甫三

歲氏以養以教備歷艱辛國衡奮志讀書補博士弟子

員氏苦節五十餘載

姜氏余九玉妻二十三歲夫故守節三十五年

管氏張坤元妻二十八歲夫故守節三十六年卒年六十

四歲

冒氏薛明萬妻守節三十二載

陳氏吳聚東妻二十一歲夫歿上事孀姑以孝稱下撫遺

孤燦成立為娶蔣氏亦能孝于姑生七孫悉命教之讀

書守節三十七載孫玉以子貴封贈二代璋歲貢生

叢氏吳承棟妻二十九歲夫歿守節三十一年

張氏薛從先妻二十九歲夫歿守節三十五年

如皋縣志 卷十九
三
昌氏生員與恒女吳風從妻二十七歲夫故守節五十五年壽八十二歲

吳氏縣丞吳天鑑女年二十三適生員李又勣性孝家人不戒于火姑卧病在床氏冒燄而入負姑而出夫亡無嗣撫姪光綬爲子食餼膺貢有文名氏自二十七歲守節壽登九十

繆氏夏兼三妻二十八歲夫歿守節三十六年

顧氏庠生顧所知女適文學吳日興時年十九歲僅閱兩月夫歿氏以婦代子職孝事翁姑繼爲龍爲嗣又早逝無出復繼培爲嗣孫伶仃孤苦備歷艱辛年五十七歲卒守節三十九年

吳氏姜東序妻二十一歲夫歿懷腹三月生男勵志冰霜撫遺孤入泮守節合例

仇氏章繼周妻二十八歲夫故守節三十三年

劉氏庠生吳棠芾妻二十八歲夫歿守節三十七年

朱氏劉鶴年妻二十七歲夫歿守節三十四年

崔氏丁芳華妻二十八歲夫歿守節三十五年

吳氏周大經妻二十三歲夫歿苦節七十年壽九十三歲

金氏謝疇九妻二十六歲守節合例

張氏劉盛妻二十五歲守節合例

紀氏吳宜鍾妻二十八歲夫歿守節三十四年揚州高太守給額旌之

陳氏生員朱僊妻性誠孝二十八歲夫歿守節合例
孫氏陳元德妻二十四歲夫歿守節三十年

宗氏胡以鳳妻年二十五歲夫歿守節三十九年

周氏許尚尊妻二十四歲夫亡遺孤五歲舅姑皆先逝周
營葬三喪撫孤授室子又亡遺一孫熒熒相守三十六
年媳丁氏亦青年守節

丁氏年二十適吳增美甫四載而寡家貧撫子女以針黹
給饗殮不給取豆渣雜糲霍食之卒年六十二歲守節
三十九年子大升請於督學劉旌曰志堅金石

顧氏邑廩生顧岱女邑廩生冒與晉妻與晉負奇才樹幟
文壇冠軍十數次屢薦不售賫志歿氏年二十八鬻簪

珥營葬每日拂拭與晉遺文瞻拜涕泣長齋諷經祝舅
姑益壽拮据十指撫育子女茹苦三十三年完貞而逝
冒氏石士龍妻二十七歲夫歿守節合例

李氏叢有誠妻二十歲守節撫孤成立百端艱苦守節四
十九年

姚氏適潘子玉生一子逋遇潘故氏年二十極貧矢志守
節撫孤母憐其苦諷之改嫁不從紡績自給嘗不舉火
者累日忽鼠穴出糧數升以濟殘喘人嘆其至誠感神
孫氏黃人玉妻夫歿孝養翁姑立嗣以延夫後

沈氏冒璧美妻二十七歲夫故守節四十二年

程氏冒有聲妻二十八歲夫故孝事翁姑撫孤子煌成立

守節五十三年

陳氏張坦仁妻十七歲夫故守節三十一年

孫氏戴璉妻二十六歲夫故守節五十四年

羅氏周建樹妻二十二歲夫歿守節四十二年

石氏生員冒惟誠妻二十一歲夫歿遺孤殤撫猶子志同

爲已子守節四十五年志同邑庠生

叢氏冒從政妻二十七歲夫故守節三十二年

呂氏冒文睿妻二十七歲夫故守節三十五年

趙氏冒起書妻十八歲夫故守節三十五年

張氏冒元璧妻二十五歲夫歿守節五十七年

顧氏冒虞璧妻二十八歲夫故守節三十二年

徐氏叢在中妻年二十夫故矢志守節壽八十卒苦節六十年

薛氏史文信妻二十三歲夫歿守節三十七年

盧氏處士叢韶廷妻夫故奉孀姑吳氏極孝姑耄年卧病

三載氏口進食手滌穢無倦心年八十終此節孝兩全

者

吳氏李又蓮妻年十八適李二十六歲夫亡舅復歿不數

年子與姑相繼歿一室四棺人鬼對泣吳賣屋安厝提

弱媳撫幼孫盡哀盡禮苦節四十九年卒年七十有五

徐氏史直妻直攻苦力學赴廣陵府試卒於邸徐聞哭踊

幾死者再翁姑以撫孤勸慰之乃依母族僦居豐利場

家益貧守節四十餘年場大使以聞齏憲載入兩淮鹽
法志

范氏陸球枝妻年二十七球枝故遺孤二長九齡四歲次
遐齡週歲氏誓不獨生父安仁泣勸撫孤乃已守節三
十一年教子有方九齡入成均遐齡遊鄉校學政尹會
一給額旌之

陳氏吳文度妻年二十歸文度越三歲夫疾篤不櫛沐者
十閱月氏時懷孕將產夫死小歛甫畢生男氏矢志撫
孤成立授室邑令高郵其苦節准免差徭邑令趙給匾
旌之曰松節冰操守節三十三年孫思顯爲邑諸生

翟氏鄧之傑妻年二十二夫故氏撫遺孤自宗起泰皆爲

諸生守節五十三年前令高瑚趙宏化皆旌之

浦氏年十七適余應時家貧性孝三載夫亡遺孤日生撫
之成立歿于雍正丙午計守節六十年子日生先浦卒
媳汪氏遵姑家範亦守節四十年

李氏盧遂良妻遂良素羸弱無昆季舅姑甚危之病劇李
封股不愈死舅抱屍大慟亦以是夕死李時年三十子
頤年在襁褓哭踊幾斃明年姑病李露禱于辰曰天禍
盧氏一日而奪吾夫又奪吾舅妾所倚賴者唯姑共撫
此藐孤耳今將靡有子遺耶復剪其右股和藥進之罔
效自是心慟形瘠不數載而歿氏節孝兩盡竟未食節
孝之報雍正間縣尹曹樞旌其宅

徐氏冒秀莫妻冒故氏年二十九嗣姪楚珍而楚珍復故所遺二孫撫之益篤卒年八十五計守節五十六年前令丁元正表其門

吳氏劉豐成妻二十三歲守節乾隆元年卒年六十四歲程氏許漢仲妻年十八適許事王舅姑暨舅姑孝養備至越七年王舅姑歿舅繼歿姑抱病甚劇氏泣禱於神剖左股進之愈越月夫病又剖右股治之不起氏誓以身殉絕粒五日死復甦念孀姑無依宗嗣未立強起奉姑撫姪爲嗣七年憂勞成疾其婢亦割股和藥以進氏覺謝之遂不食卒年三十四歲時乾隆六年七月二十二日也

李氏蔣潤妻二十一歲夫故上奉邁姑下撫孤兒乾隆十三年卒守節合例

王氏生員范直側室直四十六歲無子娶氏于別墅生提與景頤嫡廉知之收養其子遺氏歸外家九年未嘗疾怨直病篤迎歸剖股以進血不止死復甦邑孝子石京紀以詩曰不信彼蒼開老眼請看堦下雨芝蘭直卒氏熒熒挈二子再遷後嫡壽九十餘率新婦致養爲湔瀚裙踰氏年五十九終時閭左有以乩卜者乩書曰四十五載之中風雨靡寧苟非秉心塞淵安能使內外姻親咸推敬穆二十五年之內冰霜兢凜可謂鞠躬盡瘁乃至於顛危疾病不懈勤劬復書曰此中山趙夫人貞肝

贈汝西隣范孺人者其感於神明如此乾隆十四年莊學政旌其閭

吳氏邑人姜嵩年妻廩膳生姜掄元母舅玉台先歿姑丁氏年八十餘久病婦滌裙踰調藥餌斯夕侍床第爲輾轉按摩姑疾篤糞枯燥涕泣爲辨其甘苦以望其生姑彌留之際言願以來世報新婦云姑服未踰期逝乾隆十四年學政莊旌之曰潤挹姜泉

宮氏泰州檢討宮偉鏐女巡撫夢仁妹適文學冒褒褒憲副起宗仲子也姑常抱危疾氏偕夫祝天願以身代閱數日病益篤氏遂刲股以進遂得痊人以爲孝感云

石氏冒與瑚妻年二十七歲夫歿貧甚其兄弟諷以他適

氏詣冒氏宗祠截髮一縷斷手一指以示不奪守節四
十三年

謝氏胡希齡妻希齡歿時氏年二十有八無子姑馬氏素著苦節氏能秉其教貧甚常缺食以針黹易薪米奉姑糟糠自飫晏如也馬氏死氏簣土營葬見者莫不感泣守節三十四年至六十二而卒

裴氏豐利場陳日光妻二十八歲守節白首完貞

徐氏沈碩然妻二十四歲夫歿守節三十二載

范氏蔡德生妻十九歲夫歿守節五十五年

沙氏冒志同妻年十五適志同夫故氏年二十七事孀姑

石氏孝養不衰撫孤春榮春澤延師督課春澤入學守

節三十八年

張氏吳龍友妻二十二歲夫歿守節四十五年

徐氏明御萬妻二十二歲夫故守節合例

劉氏羅相齡妻二十五歲夫歿守節合例

馮氏掘港場徐德滋妻二十五歲夫歿守節合例

汪氏奈日生妻守節四十年

吳氏生員瞿銓妻二十九歲夫故守節四十八年

宗氏范采鹿妻守節十六年歿

陳氏沈準妻

丁氏曹承祚妻

湯氏桑友桐妻

吳氏江雲龍妻

劉氏監生呂孚先妻也孚先卒子靜山甫三齡氏撫養成

立爲婚娶閱數年靜山夫婦相繼亡孫琳纔週歲氏拮

据百端教養兼盡琳篤志力學由廩貢生應順天鄉試

卒於京琳子榮少年入泮又以疾卒自孚先以來四世

皆不壽而劉氏以一孀婦備歷艱辛六十有三載其苦

節可風矣

叢氏吳倫燮妻

蔣氏冒良佐妻守節四十四年

符氏叢拱辰妻

右鄭志自康熙二十二年起至乾隆十三年止已旌未

旌節婦凡二百七十五人

旌 石氏丁岷山祖母守節符例乾隆十四年

旌 郭氏姜順斯妻夫亡撫伯穎新子今熙為嗣守節三十餘年乾隆十四年

旌 沈氏馬大昆母守節符例乾隆十四年

旌 康氏仲西嶺母守節符例乾隆十四年

旌 吳氏叢喬母守節符例乾隆十四年

旌

邢氏管養堅妻二十八歲守節雍正九年壽登八十乾隆十五年

旌

薛氏尤昇鴻妻二十一歲夫歿守節四十二載乾隆十五年

旌

楊氏任其相妻守節符例乾隆十五年

旌

蔣氏冒涵九母守節符例乾隆十五年

旌

如皋縣志 卷十九 列女傳二

旌 陳氏張商者妻守節符例乾隆十五年

旌 金氏管正儀妻守節符例乾隆二十五年

呂氏父病危封股肉和藥進及痊歸監

藥無惰容疾草泣顙天曰昔為艾剗

右股引刀割肉投粥中食姑尋愈未

者再家人救免嗣子中炎婚娶畢又

為次子並立孫韞綬均撫成立乾隆

旌表建坊卒年九十一歲

陳氏趙為梁妻也為梁病歿氏年二十

子幼勤紡績謀生艱苦萬狀卒年七十有六守節五

六年乾隆二十五年請

旌建坊

錢氏孫維翰妻二十七歲夫故守節符例乾隆二十七

旌子紹業諸生

朱氏生員吳瀛妻瀛疾卒氏欲以身殉念姑老子幼未敢

輕生乃養姑育子子天有欲奪其志者斷髮剃面矢志

靡他以姪孫慥為孫教養艱苦慥又歿慥妻沈氏苦節

如朱朱守節四十八載乾隆二十八年

旌表建坊

章氏史班書妻二十六歲夫歿守節三十六年乾隆二十

九年

旌

左氏沈事宜妻夫歿氏二十三歲無子立嗣子撫若已出
勤儉持家艱辛備至年七十有五卒苦節五十三年乾
隆二十九年

旌

章氏黃淑聖妻乾隆三十四年

旌

顧氏張朝紱妻貴州修文縣知縣顧鎔女年十六歸朝紱
紱以羸疾亡氏方十八歲痛不欲生時舅學舉官閩中
祖姑及姑在堂有勸以代夫事親盡孝俟異日有可爲

夫後者爲嗣續計事重大生愈於死氏遂幡然以此自
任事祖姑劉姑叢庶姑夏得其歡心皆稱爲孝夫弟朝
縉生舅慰之曰此子有子卽爲若子氏俟朝縉生長子
壽承取爲夫後教養周至早歲成名乾隆三十八年

旌嘉慶五年卒年七十有六

許氏孝廉許猶儉之女適貢生姚立本二十四歲夫亡子
邁在襁褓教養成人遊庠有聲孫三麟食餼于庠騶登
甲子科鄉魁理補博士弟子員咸受祖母教守節三十
七年乾隆三十八年

旌

丁氏朱日新妻二十七歲夫卒冰霜自勵撫孤成立守節

五十八年乾隆三十九年

旌以清標彤管額

郝氏都督冒渾妾二十八歲夫歿守節三十二年乾隆三

十九年

旌

程氏沈維熙妻夫歿矢柏舟節不以家貧易其操守節三

十五年乾隆四十年沈璧率族人舉報請

旌建坊

傅氏繆貽書妻守節符例乾隆四十年

旌

孫氏劉淑和妻守節符例乾隆四十二年

旌

四十六年

張氏陳利和妻子歸四載利和病亡遺孤甫八月氏以頭

觸棺欲相從地下兩孀姑泣諭曰陳氏四世單傳幸有

遺孤賴撫育延宗祀吾二老婦無依資供膳終殘年若

必以身殉諒非爾亡夫志也氏始抑情節哀上奉兩世

孀姑下育孤兒備嘗艱苦有諷以改適者氏撫夫柩大

痛取剪刀劃左頰明志曰從一而終乃人理敢懷二心

與禽獸等乎苦節數十年如一日兩姑生養死葬無違

禮子嘉猷承訓得成立乾隆四十三年建坊

張氏黃世義妻年十八歲歸黃越三載黃歿氏哀毀骨立

誓無二志立嗣承夫後教養備至事翁姑孝翁姑歿喪

旌

葬盡禮守節三十五年五十六歲卒乾隆四十五年

洪氏冒四宣妻二十四歲夫故守節四十二年乾隆四十五年

旌

錢氏附貢錢五桂女適監生陳崇壽二十六歲夫故氏慟不欲生投繯幾絕舅姑慰以承祧為重乃止飲冰茹蘗曲盡孝養家寒勤針黹奉菽水得堂上歡撫嗣子驥僅五歲使就外傅長入成均夫嘗師事某某故妻孀居無子氏迎于家奉侍如姑終身無間言守節三十年乾隆四十六年建坊

旌

沈氏范全智妻守節三十一年冰擦凜然乾隆四十八年

旌建坊於城北余家橋之南

姜氏貢生徐宗耀妻年十七歸徐越七月夫歿守節三十八年乾隆五十三年建坊

旌表

管氏顧學龍妻年十七因夫病篤歸侍湯藥歲木週學龍歿竟未及成婚而寡哀毀骨立守志不易年六十有九終叔氏以子錕嗣之乾隆五十三年

旌

張氏玉先女十八歲歸繆從心明年從心卒氏有遺腹

旌
 生男為夫延一綫得女痛不欲生舅姑亟以叢琮子槍
 為嗣泣諭曰代夫養親訓子事重大賢于身殉氏遂奉
 翁姑訓數十載備歷艱辛乾隆五十四年建坊泗洲毛
 藻詩強含務婦淚曲慰老人言其事親也能膽心同
 味鷄臆母即師言其教子也嶺南黎誼登詩家鄰九十
 九灣水映出秋光到底清其一生貞潔高風可想見矣
 陳氏婁樸繼室十九歲夫故欲以身殉因舅姑俱在遺孤
 僅三月冀安白首綿弱息乃弗死辛苦持家喪葬婚配
 罔弗盡心孫岑樓入成均曾孫大元大彪入武庠守節
 六十七年乾隆五十四年

旌

徐氏冒崑繼室二十七歲夫故守節三十四年教子有典
 成立乾隆五十四年

旌

吳氏張敏修妻也敏修病亡遺孤鳳氏悲痛號呼誓以身
 殉翁姑泣曰婦死老親幼子將誰依氏遂幡然承命養
 親教子備歷艱難守節四十有二載卒年六十九子鳳
 貢成均乾隆五十四年

旌

吳氏生員沙益妻益苦學遭疾卒氏年二十七遺孤三齡
 教養艱辛俾得成立守節五十九年八十六歲卒乾隆
 五十六年

旌

郭氏鄒宗文妻宗文歿遺孤幼弱家貧襄勤女紅獲貲撫養辛苦備嘗年六十有四卒守節四十年乾隆五十六年

旌

趙氏監生叢國昌妻年二十四夫亡事孀姑至孝撫子合松有成茹荼飲藥守節四十二載乾隆五十七年

旌

季氏成來儀妻來儀病歿時氏二十一歲遺孤永齡甫十月氏痛不欲生翁姑指永齡諭之曰此呱呱泣者賴撫養勉為吾兒延一綫氏遂飲泣守節撫幼子以養以教

艱苦備嘗終其身如一日卒年七十有一乾隆五十八年請

旌建坊

仲氏吳廣生妻二十二歲夫故守節五十八年乾隆五十八年孫潛修請

旌

黃氏盧瑾妻守節符例乾隆五十八年

旌

趙氏孫煒妻年二十二夫病歿氏絕粒欲相從地下孀姑諭以婦代子職為孝詎一死畢乃事氏遂苦節養姑姑病氏禱神祇願以身代姑年老齒落氏每嚼米和牛乳

以進姑得強健壽耄立載坤為夫後教養兼至乾隆五十九年

旌

黃氏吳巖東妻吳歿時黃僅十九歲無子立吳兆鵬之子升為嗣撫育教訓為婚娶守節四十五年乾隆五十九年

旌

殷氏吉耀先妻年二十三歲夫歿遺腹生盛昌教養成立乾隆六十年

旌

黃氏盧琛妻守節符例乾隆六十年

旌

丁氏孫又傳妻二十二歲夫故孀居三十餘年玉潔冰清戚里無間言撫孤起鵬俾入成均嘉慶元年

旌

沈氏曹俊妻十八歲夫歿氏一慟幾絕欲相從地下翁姑泣勸乃抑情節哀越數月遺腹生男又天族人為立嗣孫教養備至苦節二十一載卒嘉慶二年

旌

張氏桑有組妻二十一歲夫亡守節四十年嘉慶二年

旌

傅氏福建鹽法道張學舉之副室也學舉病歿時氏年二

十三歲遺孤朝纘甫三齡朝顯纔五月痛不欲生轉念撫養幼稚俾成立肯堂構無墜家聲較身殉為重遂不
死艱苦備歷三十有三載五十五歲卒嘉慶三年

旌

吳氏公定女何宗模妻模歿氏年二十有七子文燦方六
齡氏拮据勤女紅事舅訓子備極艱辛文燦既長為授
室吳氏海若女逾年文燦病亡婦吳氏年二十三撫棺
號呼欲以身殉轉念有遺腹若生男夫有後得成立一
振衰微亦可報亡人地下閱五月生子瑩艱苦白矢上
養下教瑩未弱冠入邑庠婦姑兩世孀居節堅金石且
孝慈兼盡後先繼美非賦性肫摯曷克臻此嘉慶二年

俱

旌

沈氏章大倫妻守節符例嘉慶三年

旌

張氏桑印台妻守節符例嘉慶三年

旌

王氏秦宗周妻二十四歲夫故守節四十年嘉慶三年

旌

顧氏陳惟明妻年二十二適陳未十月夫歿撫遺腹子有
珍成立苦節三十餘年嘉慶四年

旌

王氏胡煥文妻年二十八夫歿遺孤二培德三齡培仁甫三月痛不欲生姑勸撫孤乃弗敢以身殉家貧仰給十指恒不繼然必具甘旨奉孀姑已則饜粗糲姑性嚴重氏能得其歡心姑歿竭力稱貸盡喪葬禮徐以針黹償之所居僅斗室親串至罕見其面撫二子以慈而教極嚴長為授室皆自力援例入成均奉母訓惟謹無過行氏每泣對二子曰可以報爾父於地下矣守節五十年而歿二子哀毀盡禮人以爲苦節之報嘉慶五年

旌

邵氏良志女冒元近妻年二十一歲夫歿立嗣又還拮据撫養守節三十二年嘉慶六年

旌

葛氏劉文魁之妻文魁歿氏年二十三歲矢柏舟節事翁姑至孝遺腹生女嗣子玕教養成立守節三十六年嘉慶六年

旌

桑氏馬立方妻十八歲夫歿孀居三十六年心堅金石事翁姑撫幼子勤勞備至年五十四歲嘉慶六年

旌

萬氏叢之興妻二十八歲夫歿養親撫孤守節五十四年年八十二歲嘉慶六年

旌

如皋縣志 卷十九 列女傳二

冒氏冒大慶女儒士劉嗣齡妻也年二十五歲夫故子甫生旬日氏痛不欲生翁姑慰以撫嗣承祧為重乃止閱兩載子天立姪澄為嗣辛勤教誨俾入成均姑疾嘗割股和藥餌以進曲盡孝養矢志冰霜守節三十一年嘉慶七年

旌

葛氏掘港汪日盛妻年二十二歲夫亡事翁撫孤孝慈兼至守節三十六年嘉慶七年

旌

劉氏胡全義妻二十五歲夫故踰年姑又歿喪葬盡禮時祖姑在堂翁年亦邁氏以一人奉養兩世敬進所欲備

極艱辛教子塔入成均希曾甲子副榜苦節五十三年嘉慶七年

旌

劉氏生員馮杰妻年二十一歲馮歿無子氏慟不欲生翁姑勸諭為立嗣撫如己出及翁姑歿喪葬盡禮盡哀守節三十二年嘉慶七年

旌

劉氏馮國傳妻二十五歲夫歿矢志撫孤教子成立年六十三守節三十五年嘉慶七年

旌

丁氏沙鳴琦繼室二十六歲夫故守節三十六年嘉慶七

年

旌

薛氏尤宏德母夫故氏守節符例

旌

邢氏管紹滙母夫故氏守節符例

旌

郝氏年十七歸姜全杰纔兩閱月全杰病病七月而歿有遺腹生女又天氏仰天大哭誓殉亡人地下舉家潛護不得死舅按察使穎新慰諭之日輕生非節也吾為汝立後且多立可乎德基以愛立恕基以應繼立他日猶子中或更有賢能者任擇立之氏遵舅命以養以教如

自己出生平足不踰闕言不出柵蓋端謹自守終身如一日歿後建坊榮施百世

顧氏庠生吳掄元之妻年二十三歲掄元病歿遺孤大生在襁褓氏矢志撫孤兒養而兼教大生性聰敏年十四入庠氏方冀大生異日掇巍科登仕版可以慰亡夫為聘上舍京國女沈氏未娶大生忽以疾亡時沈氏纔十五歲耳聞喪奔赴盡哀盡禮立全節為子以承夫後貞節萃于一門婦姑繼美真是敦風俗維世教顧已建坊

旌表

陳氏南陵訓導彭之女也年二十二適洪德瑄年餘瑄卒子允恭方九月氏撫之教養兼至及長游庠事翁姑盡

禮年七十六守節五十一年詳請

旌表

李氏魯藩長史冒時雨次妾時雨卒其父將迎歸改嫁氏堅拒之隔窗與語曰嫡子婦丁氏與舊伴劉氏皆共矢節矣寧肯而絕往耶遂剪髮還父在家披緇禮佛足不出戶劉氏亦時雨妾守節四十八年先是時雨子起年妻丁氏十九歲夫故久守貞操至是為構齋閣院西事之如師事劉如姑

吳氏朱道坤妻二十九歲夫故子龍雲甫十齡孤寡窶貧丸熊茹苦守貞三十三年吳善病龍雲割股愈之病劇復割肝以救母子俱活人謂節母獲孝子之報云

繆氏獻明女朱三仁妻也生兒甫八月而三仁歿時氏年二十人不能信其守氏亦不求信於人其翁數數凌之去弗可翁攜其後妻子別居氏偕其孤居舊宅門以外未嘗聞其聲窺其影舊宅與後姑子共後姑子既別居欲棄此乃共棄之去居南庄艱難辛苦三十年冰操松節始終不渝一念真誠報亡人於地下可謂堅逾金石者矣

顧氏林梓沈珪妻守節五十八年邑令崔繩武題額旌之韓氏朝卿女周天如妻天如病歿遺孤正宗甫三齡氏時年二十八椎心泣血痛不欲生既念舅姑柩停未葬夫遺一綫無依茹藥飲冰三十三載撫孤兒成立婚娶及

女學集卷之二
期延嗣續正宗生學願願子錫邑庠生邑令周鼎鑑以
坤儀母範旌其門

潘氏郭天吉妻守節四十一年邑令周鼎鑑旌曰節比松筠
石氏顧廷俊妻年二十二夫歿事舅姑撫子女壽八十餘
終監察御史五奉獎以節松齡

項氏監生劉穀慶妻姑病疇天刲股和湯藥進竟愈後病
發復然康熙三十九年周邑令獎以篤孝格天

陳氏孝廉江筆化繼室夫歿年二十八歲遺子八齡撫之
成立苦節五十年

顧氏太學生顧承舒女沈爲謹妻十九歲于歸沈奮志力
學氏篝燈紡績佐之越三載生子萬全纔八月夫故椎

心泣血以頭觸棺瀕死者屢矣翁姑曲諭以撫嗣爲重
氏乃啣悲茹哀身代子職越二年翁卒姑又罹風疾櫛
沐坐卧須人氏能曲體姑志十八年如一日及歿視含
飯製絞衿人稱其孝教子慈嚴兼至弱冠爲之授室厥
後孫曾繞膝沈氏之繼賴氏以延壽八十有九卒乾隆
四十六年請於學使以額旌焉

胡氏黃國袍繼室也事姑孝謹善持家政夫歿撫孤成立
茹荼四十餘年前邑令丁元正以節勵冰霜旌其閭

許氏許中和女李宗剛妻二十一歲夫故守節五十一年
乾隆三十一年學使曹給匾旌其門子李鵬

盧氏吳文夔妻二十六歲夫故奉孀姑遺孤甫七月撫之

成立前邑令趙廷健題額霜筠媿潔守節六十一年

徐氏冒文正妻父應祥病篤氏歸省纔天願減齡身代割

左臂肉和藥進父病頓瘳姑章氏患危症晝夜請禱又

割右臂肉和羹以進姑疾亦愈前邑侯崔給以純孝格

天額

謝氏生員李遴妻二十七歲夫故家貧矢志冰霜苦節五

十一年前邑令萬廷梧給額旌其門

繆氏李永清妻二十八歲夫歿立嗣子宣慈井日親操艱

苦備嘗前令萬廷梧給額嘉獎守節四十七年壽八十

五歲

周氏繆育萬妻二十八歲夫歿家貧撫孤三年子又夭苦

節三十六載前令宋學灝給額旌之

王氏程元麟妻三十歲夫歿苦節撫孤守節三十七年邑

令曹龍樹給以荻嚴松勁額年六十七歲

李氏呂揆妻二十九歲夫歿敬事翁姑教子欽成立守節

五十三年州守呂燕昭以冰操鶴算旌其宅

袁氏字素文太史袁枚胞妹工詩幼許字高繹組繹組有

癩疾高父母不欲誤此女致書女父以達其意氏貞節

性成矢志歸高甫四載夫卒氏惟兄嫂是依守節二十

餘年歿

王氏泰興生員王朝選女年十八適邑儒童仲鶴翥鶴翥

有文名屢試未售以攻苦致疾醫藥罔效氏夜籲斗宿

願減齡以代疾劇割股和藥進之卒不救氏誓相從地
下投繯者再以救免翁姑泣諭之乃止時年二十五身
兼子職孝養得堂上歡翁姑相繼逝喪葬盡禮教嗣子
振鵠入邑庠長為授室心力交瘁年五十六以疾卒守
節三十一年

李氏監生范連六側室連六故氏年二十五歲撫孤子顯
溥成立守節三十一年

黃氏監生范顯溥妻溥亡氏年二十四歲善事孀姑族以
孝稱矢志堅貞茹藥二十六年

胡氏侍御香山女孫也適太學生石中爻中爻患瘵疾亡
氏絕粒將以身殉姑泣止之曰余作未亡人為宗桃計

耳爾以一死成爾志余將誰依乃從姑命立族子為後
子幼多疾撫恤勤勞上事孀姑恐幾微不得適其意艱
苦備歷亦以瘵疾卒守節十五年

劉氏生員祿在女文學賈咸登妻也知書年二十八咸登
病亡家貧甚竭力事姑艱辛百狀姑憐之每日若苦矣
若苦矣子三六修六典六藝課之極嚴勤針黹伴讀至
夜分不輟時或背燈掩淚不欲令兒子輩知也後皆補
博士弟子員氏心良苦有子克振家聲亦可稍慰其志
矣

冒氏貴州玉屏縣尉冒泰女浙江青田縣知縣吳繼元子
廷琳妻也廷琳歿遺孤世勳甫四月稍長課讀嚴嘗以

夫所作詩文泣示曰此乃父心血也世孫以此勵志業
日以精補博士弟子員氏自二十八歲撫孤兒以養以
教備歷艱辛三十年如一日

郭氏太學生薛信妻也信歿遺孤履剛八歲履義六歲矢
志撫兩孤兒不避艱苦夫弟僕萬娶朱氏僕萬病歿無
子家更貧郭以次子履義為其後分餘資與之朱氏亦
艱苦守貞撫嗣子如已出孫兆鵬邑庠生

徐氏常德府通判候選知府建杓女年二十二歸寧國學
博吳方將之子太學生立中執婦道不以富貴驕夫家
翁姑稱其賢立中善病藥餌必躬親服參苓費不貲質
釵奩以濟閱七年病革無子立猶子士貽為嗣夫卒持

齋禮佛屏綺紈寡言笑足不踰閭其嚴正自律如此守
節三十八年

朱氏年二十二歸鄒師浦越三載師浦歿孤源本僅八月
祖姑及姑皆寡家貧至不能舉火人皆為氏難之氏紡
績織紉勤十指易食上奉兩世孀姑下撫幼子艱辛無
怨言迨兩世孀姑死營喪葬子長為之授室訓以禮事
親教子兩無憾焉年八十有八守節六十三載

蔡氏上舍生鄭曉繼室也年二十適曉卒氏年二十有
五撫棺號泣瀕死者數矣念姑孀且老待養嗣子錕幼
弱須教誨遂忍死仰事俯育得姑歡心錕弱冠游庠守
節十八年四十三歲卒

丁氏廩貢生呂琳妻也翁姑早逝祖姑劉孀居六十三載家貧勤女紅奉劉甘旨琳應順天鄉試卒居京邸時氏年二十九遺孤榮尙幼撫養劬勞榮早歲入泮爲聘王氏娶焉榮旋卒氏現年六十一歲守節三十有二年其婦王秉姑闈範亦青年守節

薛氏朱勗成妻勗成卒氏二十五歲遺孤敦仁甫二齡又失明貧苦無以養氏日夜勤針黹謀生上奉翁姑下撫盲子爲娶婦生孫苦節五十八年卒年八十有三

黃氏朱長備妻年二十二夫亡無子翁姑老婦代子職生養死葬皆盡禮立姪爲盛爲夫後旋病歿遺孤弱撫孀媳弱孫艱辛備歷守節四十七年卒

陸氏陳以國妻以國歿氏二十三歲有遺腹族人欲奪而嫁之不可生男其宇撫育艱辛俾成立姑老生養死葬咸盡心力苦節三十一年卒

朱氏沙樹純妻樹純歿氏年二十二子熙尊甫週歲依母家撫孤成立苦節五十八年現年八十

傅氏捐職主政仲耀賢妻耀賢亡氏年二十八婦代子職得翁姑歡翁先卒事姑尤謹撫嗣子鐸教養兼盡爲捐主簿家本饒裕勤苦不異貧家婦持已端嚴守節三十年如一日年五十有八卒

繆氏監生仲元長妻候選州判繆中石室女十七歲適仲二十七歲夫故痛不欲生翁姑苦勸矢志靡他孝事以

代子職撫二子成立鑠監生鐸候選主簿承嗣七伯耀賢

章氏候選州同章允豐女年十七歸監生冒松松病歿遺孤琦甫四齡舅年老甘旨無缺子幼弱訓誡有方艱苦備歷垂四十年可謂始終不渝者矣

管氏太學生莘田女年二十四歸庠生范曾肇閱五載曾肇卒氏欲相從地下轉念舅姑老婦代子職奉養惟謹舅姑歿喪葬皆如禮嗣孫秀南延脉夫後苦節五十餘載八十一歲卒

王氏石蘊壽妻蘊壽亡欲相從地下兄香勸以姑孀子幼上養下教愈于身殉遂抑情節哀事姑養子姑歿喪葬

盡禮子賴撫育得成立飲冰茹蘗艱苦以終

顧氏年十九歲歸太學生陳其綱期年其綱歿氏矢志靡他立肇楷爲子以疾卒復立肇魁爲子艱貞守節三十入載卒年五十七肇楷增廣生有聲鬻序肇魁庠生

洪氏候選主簿大訓女生員賈六修之妻六修疾卒遺孤二曰調梅曰霖氏上奉孀姑劉得其歡教養二子先後入泮守節四十餘年而歿

江氏季大賓妻大賓歿氏年十九歲痛哭絕粒欲以死從翁姑泣勸乃止家貧日勤針黹養親立岱爲嗣婚娶及期得孫男四人艱苦守節六十二年卒年八十歲

鄧氏太學生宋清臣妻也清臣卒氏年二十三遺孤元音

甫三齡艱難撫養得成立援例入成均又以羸疾亡苦節四十五年壽六十八歲而歿

鄧氏曹澄川妻也于歸三載澄川以疾亡氏年二十三歲撫遺孤以養以教冀得成立孤又早卒備嘗艱苦四十有二載卒年六十五歲

顧氏國子生鄧學豫妻學豫以疾亡氏年二十有五矢志守節始終不渝家徒四壁艱苦備嘗四十有九年七十四歲卒

周氏廉州府同知黃大鶴側室也大鶴歿氏觸棺流血誓以身殉恐父母奪其志眾泣勸不即死乃與眾約從一義也倘有他說誓不生遺腹生男旋殤晝夜悲涕嘔血

以亡時年二十有一以身殉義妾婦中見亦罕矣

汪氏州同汪起瀾之次女年十六適監生鄭迪迪歿氏年二十有五子岫八齡嶠週歲時欲從夫俱亡念孀姑年老孤子無依強作未亡人造腹生疑上養下教備極苦辛卒年六十有七守節四十二年

顧氏懷寧訓導恒學女適青田縣令吳繼元子詠邑庠生病歿氏時年二十八撫孤兒世壽為聘冒氏未合齋世壽復卒冒氏來事姑婦姑拮据勤紡績辛苦萬狀顧年六十歲守節三十二年

田氏周健行妻健行病亡欲以身殉母凌泣勸乃止家貧寡勤紡績謀生養翁姑撫幼稚歷艱苦者三十餘年

田氏夏成之之妻也夫歿婦代子職敬事翁姑為夫立後
婚娶及期艱苦三十餘年年六十有六歲

洪氏上舍石中騏妻年二十一夫亡遺孤三齡事翁孝謹
撫孤兒為授室子又歿傷而成疾卒守節二十六年

郭氏東鄙農家女歸冒志甫志甫早卒家貧依母家兄弟
諷以改適氏矢志不二兄弟曰守節良非易事必餐冰

嚼鐵乃可為耳適柱上有鐵釘氏遽取嚙之應口而斷
兄弟乃莫敢言母家亦貧不能長相依外家聞而迎之

遂終老焉計守節五十餘載
冒氏隆祈女十八歲適白蒲顧象中三載象中卒其父以

年少家貧微諷之氏誓死靡他守節三十餘年嗣子顧

確

江氏老儒江安國女幼精女工隨母紡績以佐父讀年二
十五適吳申培四年夫歿矢志守節奉翁姑二十年甘

旨喪葬之費皆取給于女紅及夫家母家俱無依獨居
茅屋一椽勤針黹易粟自給終歲未得一飽苦節三十

餘年
冒氏東郊農民冒文才女文才無子貧無肯為其後者因

贅壻管世民未幾管卒氏年甫二十矢志守節竭力孝
養父母苦節三十餘年

朱氏待詔朱濂女明經許祈妻二十六歲夫故事孀姑以
孝撫嗣子懷對成立飲冰茹蘗艱苦備嘗卒年七十守

節四十四年

張氏張尊賢女年二十適桑有祖逾四載夫歿奉姑至孝未幾姑又歿氏慟內無依倚願從姑死翁桑卜望勸慰之乃已竭力事翁翁憐其節孝立嗣子堅守節三十六年

魏氏年十八歸馬仁遠五月而夫逝其祖憫其年少微詞諷之遂終身不歸寧苦節四十三年

程氏年十九歸沈百志越五載夫亡氏夜泣縊于棺側姑救得免姑病氏刲臂肉和湯藥進病少間閱數月死殯畢率三歲嗣子依孀母陳居未幾母又死子將婚又死煢煢子立吞冰茹蘗四十六年

姜氏白蒲鄭雲飛妻年二十六夫故撫孤英彥長授室英彥又亡率其媳李氏共勵苦節壽八十五卒英彥子士奇亦早亡孫媳吳氏恪守素風人推三世冰清

桑氏桑織文女歸馬學恒年十九夫逝布衣蔬食閨範整肅奉舅姑膳必親調撫孤瑛成立守節符例

楊氏雙店鎮楊仁山女年十九適任其勦半載而寡拮据奉姑嫜并撫粹歲叔至長授室待其生子為嗣守節五十四年

陳氏拔貢生揀發陝西知縣顧元妻二十八歲夫故守節六十八年九十六歲卒

孫氏吳禧妻年二十六夫歿事舅姑以孝親操井臼及針

菑不能給乃率子孫耕種僅免饑寒年九十三歲苦節六十七年

路氏儒童叢方昇妻二十一歲夫故事翁撫孤備極艱辛子含山中年早逝氏裸孫之瑞成立年八十七卒苦節六十七載

李氏鄜州吏目劉枝芳妻守節三十八年繆氏生員劉枝蔭妻守節四十年張氏劉枝靄妻守節三十七年一門三孀共矢柏舟聞者憫其苦而嘉其節

蔣氏范曾閔妻二十九歲夫歿飲冰茹蘗矢志堅貞勤針黹紡績以佐饗殮訓子以義方子麒驥勵志讀書俱遊庠序現守節四十三年年七十二歲

孫氏石中瑛妻夫歿氏年二十二歲痛不欲生父永錫勸以上有邁姑下無子嗣輕生何如守節因勉承父命孝事邁姑得其歡心喪葬無缺禮以紡績讀書教家嚴整勤儉嗣子履謙有聲庠序卒年七十有四守節五十二年

袁氏廩生馬子櫓妻櫓績學攻苦早逝氏年二十四事舅姑以孝聞教嗣子庭璵成立苦節三十四載

王氏江大銘妻二十八歲夫故誓死靡他哀毀骨立勤紡績謀針黹上事下撫備歷艱辛訓嗣子村成立官廣西河池州吏目孫豫章人成均守節四十六年卒

繆氏丁恒菴妻夫故氏年十九遺孤同萬甫匝月矢志撫

孤及長授室中年又逝遺孫盛鵬教之讀書氏年七十
四守節五十五年媳黃氏亦苦節事姑

黃氏理問黃大音女適陳桂爲妻二十二歲夫故矢志冰
霜舅姑歿喪葬盡哀人皆以孝稱守節三十五年

姜氏韓尊商妻二十九歲夫故矢志冰霜家貧勤針黹以
佐饗殮教子韓有德嚴慈並至俾成立壽九十三而終
守節六十四年節壽兩全

陳氏生員吳正笏妻正笏攻苦力學資志不遇才名噪一
時而坎坷早逝氏飲冰茹蘗備歷艱辛教子羅酉希濂
有聲庠序守節四十八年

史氏州同史學山之女王裕昆之妻夫歿無子繼姪爲嗣

姪歿復嗣姪孫爲嗣孫苦節四十三年六十八歲卒

岑氏仁和縣岑復華女適典史林金書子紫齡齡隨父宦
遊浙江入贅岑甫數日抱病就醫維揚旋卒氏聞訃自
浙奔喪立嗣守節奉舅姑以孝稱教子成立苦節二十
九年歿

徐氏監生范鰲側室年二十四孀居矢志從一飲冰茹蘗
撫子顯淇成立爲授室猶紡績不輟年五十五歲守節
三十一年

程氏姜職九妻夫故年二十哀慟慘切誓不獨生隣嫗勸
曰以身殉不如撫孤氏乃截髮自誓嗣子實粟在襁褓
艱辛撫養俾得成立年五十二歲守節三十二年

程氏洪蔭玉妻二十三歲夫歿遺子纔週歲矢志撫孤備嘗艱苦年七十有五守節五十二年

江氏羅易書妻守節五十年撫孤良弼成立娶桑氏良弼早年逝桑氏年二十五繼志守節以紡績事孀姑姑逝

喪葬盡禮年六十一歲守節三十六年
王氏張文郁妻夫故年二十九誓以身殉姑慰以撫孤為重乃忍自存活事姑教子孝慈兼盡守節三十五年

顧氏朱子登妻生子龍珠甫三歲子登殂氏年二十有二痛欲身殉姑勸之乃止事孀姑撫幼子備極艱苦姑歿

子復繼亡父母欲令改適百折不回立猶子為嗣生孫家業復振年逾七十而卒

丁氏吳綺弼妻二十一歲夫故結褵甫二月奉孀姑撫嗣子守節五十八年年七十九

石氏名韻仙主簿石師女幼嗜學通書史工詩善鼓琴母病禱於神祈以身代病篤潛割左股肉和羹以進母病尋愈及笄歸監生錢善昱敬執婦道事翁及祖姑皆盡孝年四十有六卒子啟元業儒

江氏生員姜槐妻姑多病勤劬侍養得姑歡心初氏未嫁時父楫邑諸生嘗病篤氏割左臂和藥以進楫病尋愈未嫁孝於其親既嫁孝於其姑蓋根于天性至相夫教子皆由此推也

陶氏夏惟初妻年未及笄能通孝經祖父鍾愛之氏亦善

事祖父祖病醫藥罔效割股和藥以進祖病得痊及適夏奉翁姑克盡婦道人咸以孝稱

吳氏黃蘊奇妻年十七歸黃三載生二子黃歿矢志守節與其嫂張烈女相依爲命鉛華不御色笑不形辛勤紡績奉翁姑撫幼子鄉里重之

王氏庠生繆容也妻年二十九夫故守節五十八載辛苦備嘗王在室時母病割股以進乃瘳歸繆姑病二十餘年親奉湯藥服勞不倦教子寄陶成立

蔣氏仲元成妻事翁姑以孝聞年二十八夫亡冰霜自矢家貧撫嗣子荼苦自甘乾隆三十七年卒守節十八載徐氏程大綱妻二十九歲夫歿孝事翁姑喪葬皆出紡績

之資叔幼嗣別支氏以夫故力請歸宗生二子氏嗣其一焉守節三十三年

薛氏朱育德妻十八歲適朱朱素有羸疾于歸十二日夫故誓死守貞事翁姑以孝姑病割股和藥以進年七十一歲守節五十三年嗣子鸞

程氏陳栻妻年二十五歸陳三閱月栻歿水漿不入口者數日將以身殉遵翁姑命爲未亡人立猶子鈞爲嗣孩提鞠育稍長課書未弱冠蜚聲黌序皆氏教養之功事翁姑生盡孝歿盡禮艱苦備嘗年五十五歲苦節三十年

謝氏鄒峻山妻年十九于歸結褵甫月餘峻歿欲以身殉

姑勸之乃止繼嗣承夫後家貧紡績為生事姑克孝撫孤克慈年六十一歲守節四十二年

鄧氏陳英華妻夫歿氏年二十矢志靡他毀容截髮翁姑老且病侍湯藥無惰容歿後喪葬盡禮因子遵得廢疾憂勞而卒苦節三十一年

饒氏王有禮妻年二十六夫歿遺孤僅八月欲以身殉親戚苦勸勉為未亡人撫孤成立為授室守節五十七年

朱氏童仲山妻二十九歲夫歿念翁姑侍奉無人不敢死躬代子職翁姑歿喪葬皆出紡績之資撫遺孤成立年七十歲守節四十一年

石氏王聖滌妻二十八歲夫歿因有遺腹未忍身殉後生子遺年恩勤驚閔婚娶以時守節五十年

顧氏錢方來妻三十歲夫歿治喪葬撫孤子皆取給子針黹中年子又歿茹苦六十四年卒年九十四

袁氏郭黃秋妻二十七歲夫歿以姑年老不敢死勤劬奉姑立嗣子教養成立年六十八歲守節四十一年

陳氏袁爾英妻十九歲夫歿氏欲相從地下姑諭以似續為重方有娠奈何輕此身乃止遲三月生男秉彜稍長延師教讀得有成年七十九歲守節六十年

范氏季律和妻年十九夫故生子光輝甫週歲氏上事翁姑下撫弱息子長配繆氏未幾子又卒媳年二十四繼志苦守一門雙節范氏年五十七歲守節三十八年

志苦守一門雙節范氏年五十七歲守節三十八年

李氏冒綜妻年十九夫歿慟欲俱亡姑泣諭遺孤甫二齡無人鞠育氏勉應命其母盧病篤氏割股療疾年五十守節三十一年

王氏監生盧錡妻錡卒氏年二十三躬親紡績不辭艱苦撫遺孤榮慶長而授室援例邀末秩守節三十一年年五十八歲

鄒氏徐廷忠妻十八歲夫歿絕粒觸棺幾殞親族諭以撫孤乃止立嗣子鳴壽愛如已出身親耕織艱苦備嘗子長爲議婚延宗祀焉守節四十五年

高氏生員史發蘭妻翰林鳴皇家媳事翁姑以孝聞夫歿矢志撫孤嚴慈兼盡俾成立入邑庠守節二十九年歿

李氏陳麟標妻二十四歲夫卒典質奩具治葬備哀痛幾絕誓死靡他以針黹自給撫嗣子勗讀書求進取守節三十三年年五十七歲

丁氏副榜蔣大本妻年二十七蔣歿翁殯未舉孀姑老病養生送死婦兼子職教嗣子春旗勤學不怠并撫伯氏大中子女六人憫其失恃也守節四十六年年七十三歲現在請旌

陳氏劉永慶妻陳氏劉永慶妻慶度相繼亡兩陳氏同志矢貞爭引剪毀容誓死不二撫孤以延劉氏宗緒一二十五年守節一二十七年守節俱三十六年

宗氏生員冒國棟妻二十四歲夫故遺孤甫十月茹苦守

貞教子文煥讀書伯氏國柱無嗣命子續長房祀守節
三十七年年六十歲

閻氏進家莊人適張亭育未一年張歿氏二十一歲遺腹
生子裕遠事孀姑養生送死皆資女紅撫子長授室舉
孫六人守節三十四年

徐氏叢之松妻二十五歲夫故遺孤甫四歲數月間翁姑
相繼逝湯藥殯葬曲盡婦道撫子乃圖成立孫廩生盛
鳴五齡喪母亦氏教養成人守節三十六年

楊氏生員吳明良妻二十七歲夫故遺孤二皆幼孀姑在
堂氏艱貞守節誓死靡他姑病三月衣不解帶歿經營
喪葬皆盡禮教子墨池輩成立守節三十八年

宗氏年十九適楊經未一載經疾劇氏刲左股進創甚幾
絕夫病卒不瘳氏誓不獨生翁姑泣諭乃已生遺腹子
庚西翁家中落多積逋出簪珥償之奩具爲空姑疾侍
湯藥睫不交者累月旣歿哭盡哀家甚貧以針黹自給
撫孤成立竟以勞瘁死鄉里悼之

紀氏陳平公妻二十九歲夫故撫孤締臣年十四入泮娶
沈氏締臣又早逝紀率孀媳同居十餘年沈先卒紀守
節符例

冒氏州同冒澄女適喬希尹二十二歲夫歿子女相繼皆
亡矢志守貞敬事舅姑家貧而節益堅茹苦四十三年
紀氏適布政司經歷黃鑑二十四歲夫故孝奉翁姑子之

濤授室後夫婦相繼逝撫嗣孫馨守節四十二年年六十六歲

冒氏廩生昌可久女適庠生宗世澤十九歲夫歿無子立嗣旋天事邁翁喪葬盡禮守節四十六年

吳氏叢盛景妻二十二歲夫故子纔週歲氏上奉孀姑下撫幼子孝慈交至茹苦完貞五十二年年六十歲

陳氏汪之瑛妻二十五歲夫故欲從死念孀姑孺子不忍捐生矢志守節三十五年年六十歲

吳氏增生郭凌妻二十七歲夫故竭力奉翁姑遺孤夭亡嗣子豫游庠守節三十五年年六十二歲

潘氏世萊之女適監生黃元杰二十八歲夫故孝孀姑撫

子學墳成立守節四十三年

姜氏石瑜美妻二十二歲夫故事孀姑克孝嗣子中易教之成立守節三十八年

鄧氏鄧舜若女顧昇妻年二十四適顧值歲饑疫舅姑及夫相繼亡貧甚竭力營葬畢欲以身殉遺腹舉一男曰

顧氏幸有後矣矢志冰霜撫孤成立守節三十二年年六十有六卒

沈氏江西布政使庫大使錢善昂妻二十五歲夫歿撫孤成婚不幸又歿立孫升撫養讀書入泮守節三十九年

薛氏韓紹儼妻儼歿時年十九遺孤僅數月翁姑年邁且病薛為夫治喪後藉女紅以奉甘旨晨昏無缺及翁姑

相繼歿喪葬盡禮守節五十五年七十四歲卒

王氏沈綺妻三十歲夫歿事翁姑撫嗣子人稱慈孝歷年

八十三歲守節五十三年

薛氏王嘉壽妻二十八歲夫歿矢志苦守撫幼子東昇以

養以教俾入成均壽八十三歲守節五十六年

李氏湯淑和妻年十八夫歿遺孤尚在襁褓矢志守節子

長爲授室又早喪遺幼孫亦賴教養年八十一歲終守

節六十三年

繆氏李景陶妻景陶歿氏年二十四有遺腹逾月生男家

貧上奉翁姑下撫孤兒艱苦備嘗守節五十年七十有

四歲卒

陳氏蔣翼陶妻二十四歲夫歿抱棺痛哭淚盡繼以血孤

纔七齡艱辛鞠育俾得成立而氏卒

管氏貢生維驥女適儒童張輪翼甫七月夫歿氏年二十

一歲矢志守貞鉛華弗御事孀姑以孝聞守節三十六

年

仲氏金鼎妻二十七歲夫歿撫嗣子如已出茹苦守貞四

十六載年七十有三

丁氏許興田妻二十九歲夫歿孝翁姑撫幼子飲冰茹苦

備歷艱辛守節四十七載年七十有六

朱氏陳麟彪妻二十二歲夫歿冰霜自守勤儉持家守節

四十載年六十二

顧氏姜泰基妻二十歲夫故嗣子慶曾甫彌月撫之如已出教養兼至及長入泮年五十有五守節三十五年

徐氏葛學溥妻二十九歲夫歿誓從夫地下族人勸之乃止遺孤大度甫四齡氏矢志撫孤延師課讀稍長俾人

成均勤儉持家冰霜自矢守節四十二載歿年七十一歲

葛氏國學生曹緒四妻家貧撫八歲孤守貞茹苦三十八年而歿

石氏國學生鄭繼元繼配元歿時年二十一嗣子尹敦教以義方事翁姑先意承志守節五十五載年七十有五

繆氏陳來麒妻年方十九夫歿誓死不二事翁撫孤孝慈

兼盡苦節五十一年

葉氏叢乃堂妻二十二歲夫歿立姪衡為子教之誦讀撫

若已出年六十有一守節四十載

劉氏吳屬田妻二十七歲夫故家貧熒熒無依冰操自勵

守節四十七年

顧氏吳繼聖妻二十九歲夫歿教子大震讀書遊庠姜氏

吳大觀妻顧媳也觀歿時姜年亦二十九上奉孀姑下

撫幼子顧年八十有九苦節六十一年姜年六十有八

苦節三十九年

桑氏豐利場馬大興妻年十七夫亡撫遺腹子學嚴出就

外傅氏疾革泣謂子曰爾成人爾父不死矣願兒讀書

繼志有以報汝父遂瞑苦節十六年

冒氏冒雲藻女歸國學顧淮淮歿氏二十一歲冰霜自勵嗣子世熾守節四十七年

吳氏吳鶴聞女適顧殿揚數載夫故上有翁姑遺孤甫三歲氏日勤婦功仰事俯育守節三十九年

李氏管國儒妻年二十六夫亡生子二長琳次琮俱幼誓志勵節事舅姑以孝稱訓子嚴而有法家貧級績自給無怨悔心年六十有四乾隆三十六年卒

陳氏生員李途妻途力學早逝氏年二十九堅守撫孤教子聯芳誦讀家貧惟兄嫂是依苦節三十八載

黃氏黃維周女王建平妻二十二歲夫故事翁姑撫幼子

矢志冰霜守節十八年歿與例相符

沙氏明經朱日宣妻二十七歲夫亡投繯幾殞孝事邁姑教子國穎國願成立全遠服妯娌之節撫同胞亡弟之孤殯母養父修廟施棺守節三十年

陳氏朱松茂妻二十七歲夫故婦兼子職喪葬克盡孝道撫七齡遺孤桐俾成立勤學人成均年八十一歲

朱氏監生陳達政妻二十九歲夫歿孝事孀姑撫養遺孤教子雲標候選州同知邑令田如芬贈荻影霜清額

章氏增生章紹曾女適嚴相亭爲妻二十歲夫故守節三十三年現年五十三歲

朱氏林思齊妻二十二歲夫故苦志完貞孝養孀姑守節

三十四年

范氏丁偉公妻二十八歲夫故事翁姑以孝聞守節三十

八年

范氏仲一挂妻二十二歲夫歿立嗣守節上有邁姑孝養

無違年六十有二苦節四十年

溫氏郭圍久妻二十一歲歸郭僅九月夫病割股以療終

不起誓死靡他繼嗣承祧鞠育撫養備嘗艱苦守節三

十八年

花氏湯世鵬妻年十九夫歿因有遺孤遵母命不死孤天

立嗣子撫之備嘗艱苦年五十有三苦節三十四年

仇氏叢攸宜妻年二十二夫歿撫孤苦守翁姑年邁養生

送死皆盡禮孤天撫嗣子歷嘗艱辛年七十有三守節

五十一年

王氏汪振聲妻適汪一載夫歿氏年十九上有孀姑不忍

就死藉女紅以養立嗣教育備歷艱辛守節三十九年

沈氏湯西麟妻二十九歲夫歿事翁姑撫嗣子孝慈兼盡

年六十有五守節三十六年

薛氏姜錫男妻年二十七夫歿觸棺慟絕誓以身殉緣子

淞時在襁褓教育無人乃不死紡績課讀教子遊庠守

節符例

丁氏楊一貞妻年二十六夫歿家寒翁老媳代子職撫孤

成立心力交瘁年七十有五守節四十九年

薛氏陳泣妻年三十夫歿欲以身殉因姑老且乏嗣乃勉存事姑繼嗣兆慶撫之成立年六十一守節三十一年

朱氏生員吳模妻年二十五夫歿篝燈紡績課子讀書長為授室子又死乃撫遺孫年七十有五苦節五十三年

何氏孫棠妻二十五歲夫歿奉邁姑盡孝姑逾八十賴氏維持之守節三十一年年五十五歲

范氏紀永高妻十七歲夫故無子立姪文進為嗣事翁姑孝喪葬盡禮守節五十四年年七十一歲

周氏生員冒天誠妾年三十夫故矢志冰操撫孤教讀年七十三歲守節四十三年

沙氏吳莘友妻二十五歲夫故克勤克儉至老不倦年八

十二歲守節五十九年

王氏孟讓妻年二十六歲夫故冰霜自勵守節四十三年宋氏劉嘉華妻年二十三夫歿無嗣立宏美為嗣愛若已

出教養成立年五十有五守節三十二年韓氏孫世明妻二十三歲夫歿矢志靡他立嗣德懷教養

並至守節三十年蔣氏邵士宏妻二十一歲夫故家貧茹苦守節三十八年

喻氏薛序東妻年二十歲守節夫翁先後疾皆割股以療人稱其苦節篤孝

蔣氏胡鶴年妻夫歿年二十八矢志守節勤針黹撫孤年五十五歲苦節二十七年

張氏丁盛宣妻二十六歲夫歿撫遺子事孀姑年四十九歲守節二十三年

周氏朱近臣妻二十八歲夫歿冰操自矢奉養翁姑艱苦備至守節三十一年子椿監生

嚴氏蔣耀彬妻二十八歲夫歿事翁撫孤孝慈兼盡守節五十八年

張氏顧躍龍妻二十二歲夫歿奉姑撫子守節五十四年

沈氏顧音煌妻二十七歲夫歿守節三十一年

繆氏顧西山妻二十四歲夫歿守節五十一年現年七十五歲

包氏張學玉妻十九歲夫歿守節三十七年年五十六歲

吳氏顧濬妻二十六歲夫歿茹苦守節三十八年

叢氏顧彩文妻二十七歲夫故遺孤仲華甫數月矢志撫孤養殮不給耕織身親以勞瘁死守節二十年

徐氏冒伯和妻二十五歲夫歿紡績奉姑教子成立孫曾繞膝守節三十七年年六十二歲

潘氏江國徵妻二十四歲夫歿撫幼叔成立立其子爲嗣守節三十四年年五十八歲

周氏范宏儒妻二十九歲夫歿飲冰齧雪耕織撫孤守節四十二年

石氏鄭景細妻二十六歲夫故守節三十八年年六十四歲

李氏主簿顧元繼室二十四歲夫故孝慈兼盡教子溶浩

俱入成均守節三十二年五十六歲

薛氏儒童顧清正妻二十六歲夫故守節三十八年年六

十四歲

薛氏蔡廷珍妻二十九歲夫故守節三十九年

賈氏生員劉禹績妻二十九歲夫故事孀姑撫孤兒苦節

四十六年卒年七十五歲

郝氏高志餘妻二十一歲夫故孝慈兼盡撫子天諫成立

守節四十年

朱氏陳爾亮妻年二十九夫故事孀姑盡孝教子秉銓秉

鑑成立守節符例

洪氏陳娛耕妻夫歿守節六十七年

冒氏陳振廷繼妻夫歿守節四十五年

戴氏陳贊皇妻夫故守節五十四年

張氏陳友筠妻夫故安貧撫孤守節五十年

陸氏陳興宗妻二十歲夫故守節五十年

顧氏陳維三妻二十一歲夫故守節三十三年

王氏陳鳴臯妻二十四歲夫故守節五十年

張氏王文學妻夫故守節四十年

鄧氏吳國禮妻夫故守節五十年

叢氏馬塘羅道一妻二十七歲夫歿事舅姑撫孤子苦節

五十九年年八十四歲

如皋縣志 卷十九 列女傳二
楊氏李懋昭妾二十五歲夫故守節二十年歿與例相符

徐氏趙德妻二十歲夫故撫孤長庚成立守節符例

馬氏徐蘭友妻二十九歲夫故教子士彬入成均守節符

例

郭氏沙駿發妻夫故守節三十一年現年五十六歲

王氏石敬之妻年二十九夫歿撫遺腹孤成立八十四歲

終

沈氏王兆桂妻年十九于歸踰歲夫亡矢志完貞歷三十

載如一日年五十歲

姜氏張丰登妻年二十二歲夫歿守節二十六年年四十

八歲

桑氏范孔授妻年二十三歲夫歿茹苦守節四十四年六

十七歲終

周氏盧志松妻三十歲夫歿守節三十八年年六十八歲

林氏施兆魁妻二十九歲夫故守節三十九年

楊氏薛有年妻十六歲夫疾割股療之卒不瘳孝事舅姑

守節三十年

許氏顧全信妻二十六歲夫歿守節四十一年現年六十

七歲

劉氏監生徐鳳亭妻二十三歲夫故無子嗣子金鰲武舉

守節三十二年

危氏叢廷銓妻年二十一歲夫歿苦節六十年八十一歲

終

曹氏沈穎異妻二十九歲夫故守節四十年

陳氏沈晝堂妻二十六歲夫歿守節三十七年

沙氏陳鳴鸞妻二十九歲夫故守節二十六年五十五歲歿

朱氏管世德妻適管三載年二十二夫歿立嗣撫孤守節

四十五年

陸氏袁崑崗妻年二十四夫歿繼嗣教養備嘗艱辛守節

四十七年

汪氏王商山妻年二十八夫歿事姑撫孤孝慈兼至苦節

四十一年

倪氏宗元衡妻二十九歲夫歿矢志靡他撫孤授室守節

二十年四十九歲卒

王氏汪瞻山妻十九歲夫歿孝事舅姑立嗣子咸寧守節

三十九年

虞氏徐國昌妻二十五歲徐歿翁姑年邁婦代子職生事

死葬莫不盡禮遺孤三長南州五歲次景州次方州纔

三月辛勤備至撫育成立及長俱爲授室男耕女織一

秉母教孫七人曾孫一人皆以爲節孝之報云年六十

五歲守節四十年

徐氏監生范騏妻十九歲范亡守節三十一年

叢氏錢籲俊妻二十九歲錢歿守節三十六年

陸氏翁佳相側室二十五歲翁歿遺孤允晟方三月甘貧茹苦守節五十年現年七十五歲

沈氏王兆貴妻十九歲夫歿守節四十年現年六十歲

程氏洪蔭玉妻二十三歲洪故守節五十二年現年七十

有五

吳氏管萬英妻二十五歲夫故苦節六十一年

冒氏冒起鶴女丁允昇妻二十九歲夫故守節四十八年

錢氏丁世璵妻二十七歲夫故守節五十四年

郭氏冒信書妻二十五歲夫故守節三十五年

曹氏冒有本妻十九歲夫故六十九歲終守節五十年

曹氏冒三德妻二十九歲夫故守節三十三年

吳氏冒學仁妻二十三歲夫故守節三十五年

薛氏冒子廷妻二十九歲夫故守節三十年

張氏冒宗耀妻二十八歲夫故守節五十八年

張氏冒子耀妻二十五歲夫故守節五十七年

朱氏冒奇章妻二十九歲夫故守節三十一年

徐氏冒伯和妻二十四歲夫故守節三十二年子玉輝玉

燦

張氏冒南齊妻二十七歲夫故守節三十年

孫氏冒光宗妻二十二歲夫故守節三十一年

管氏生員范曾安妻二十歲夫故守節六十年

宗氏宗承泰女生員沙烜妻二十七歲夫故艱苦終身守

節五十三年

劉氏劉西獻女冒咸寧妻十八歲夫故守節四十六年

叢氏冒仲久妻二十七歲夫故守節三十四年子維岳

丁氏吳殷葵妻守節四十五年

繆氏周開國妻年二十七夫故守節四十六年

劉氏劉無爭女徐惟一妻夫卒苦節三十餘年子葵

石氏丁元弼妻二十歲夫卒撫遺腹子長篋入學守節四

十年

繆氏繆履厚女朱耀先妻二十四歲夫故守節四十二年

何氏冒譽仲妻夫亡氏二十一歲守節五十九年

沈氏吳耀南妻二十七歲夫故遺孤甫八月教養成人奉

翁姑喪葬盡禮苦節四十八年

陳氏太史姜任修第三子生員文載妻二十三歲夫故艱

苦守節五十年七十有二歲卒

叢氏張坤元妻二十八歲夫故事翁姑克盡孝敬撫孤松

年成立守節四十三年

馬氏劉學秀妻二十九歲夫故事翁撫孤守節符例

鄧氏孝廉錢標林之長子庠生煒嘉妻二十四歲夫歿撫

孤成立守節四十四年年六十八歲

卜氏夏國禮妻二十二歲夫故奉翁姑生事死葬咸盡禮

撫嗣子承祖成立苦節四十四年年六十六歲

謝氏張文彬妻二十八歲夫歿守節三十二年

方氏蔡正卿妻二十三歲夫歿守節五十年

花氏劉觀爵妻二十二歲夫故守節六十八年壽九十

花氏劉君山妻三十歲夫故守節三十六年

許氏叢瞻山妻二十三歲夫故守節三十八年

曹氏杭國如妻二十五歲守節符例

陳氏叢玉潤妻守節三十七年

婁氏姜尚綱妻守節四十三年

吳氏生員錢悅妻守節符例

沈氏薛元鼎妻守節符例

趙氏李尚綱妻守節符例

施氏庠生孫勒妻年二十八夫亡家徒壁立事翁姑以孝

聞教子汝煌補博士弟子員守節三十四年

顧氏吳子尚妻年三十夫歿于薊子敦方六歲氏以紉績

自給撫孤成立苦節五十年

吳氏徐春榮妻夫卒氏年二十九撫孤世雄備歷艱辛守

節三十八年世雄亦早逝婦馮氏亦繼姑志守貞

王氏徐文奎妻年二十三夫亡氏奉衰姑撫幼子困苦備

嘗守節四十二年

羅氏十九歲歸徐萬象闕四載夫卒氏勵志守節嗣子步

仁又早逝茹苦異常胞弟之子庠生遇為擬循例請旌

氏辭曰祀斬焉用旌為壽八十三守節六十一年

陳氏監生顧言妻年二十九夫故氏以紡績事舅姑及舅

姑歿積有餘資好施舍助修四賢祠育嬰堂佛堂廟司
徒廟事載碑記守節五十年

管氏顧幹亭妻年十九夫病與釵環以百金祈禱城隍廟
卒不應夫亡哭踊幾絕嗣子長慶現守節三十六年

項氏監生洪必理妻年二十一夫亡無子立姪爲嗣家道
中落茹苦不恤守節四十八年

方氏蔡正誼妻年二十四夫歿守節四十六年

顧氏庠生郭嶸妻年二十九嶸卒子沂方數齡氏辛勤撫
育教沂讀書遊庠苦節三十年

朱氏顧朝達妻年二十四夫亡苦節四十年

陳氏適季領三爲妻年二十八夫歿守節四十年

金氏季懋昭妻年三十夫故甘貧守節力撫諸子壽八十

二歲

戴氏王廷若妻二十九歲夫歿家貧子幼苦志守節四十
七年

馮氏奈脚村妻年二十四夫歿苦節至九十餘歲

蘇氏適羅某羅愚劣不能治生賺氏鬻之氏誓不辱方白
經恍惚見羅之祖曰明日邑尊過此爾當訴越日果至
氏突出求救許入菴焚修時年二十八歷今三十二年

邱氏王德祥妻年三十夫歿撫孤守節三十九年

竇氏管紹南妻年二十六夫亡守節三十年

陳氏趙蔚然妻年二十五夫亡現守節三十六年

劉氏監生呂印若妻年二十九夫故現守節三十六年

馬氏幼失怙恃兄嫂是依年十八適監生吳國賓姑病篤

封股和藥姑病愈二十九歲夫卒氏茹蔬諷經現守節

三十一年

陳氏適徐敦彞年二十四夫歿子在襁褓氏欲身殉念孤

兒無依強自存活子弱冠又卒子然一身現苦節三十

四年

程氏洪道存妻年二十三夫歿苦節三十三年

錢氏農人張四妻年二十三夫歿茹苦守節六十年

程氏陸香芸妻徽籍寄居掘港年二十四夫歿貧苦不堪

氏矢志守節五十二年

朱氏管永懷妻年二十二夫歿時祖姑九十四歲姑歿翁

老家貧氏奉兩世悉藉針黹翁與祖姑相繼亡盡鬻所

有以營喪葬現守節四十五年

朱氏何自虞妻年二十八夫亡氏奉衰翁生事死葬克盡

禮教子成守節四十八年

湯氏高朝順妻年二十六夫歿守節三十六年

張氏管文德妻年二十七夫歿苦節五十年

任氏管文繡妻年二十八夫歿事衰翁盡孝撫遺孤成立

現守節三十年

張氏程秉仁妻工詩年三十夫卒遺一子二女室如懸罄

以針黹度日撫子女成立現守節符例

吳氏適景某夫暴疾死氏年三十熒熒一身現守節三十年

汪氏陶達山妻年二十一夫故老翁在堂遺孤在抱茹藥飲冰歷五十年

楊氏姊妹三人長適邱某夫歿孀居次歸黃應奎二十七歲黃歿守節四十七年幼配羅志綱年二十四羅歿撫子完貞現三十六年

於氏顧九衢妻二十八歲守節凡四十三年

蔡氏顧聖傳妻顧歿家貧氏苦節三十一年

程氏孟孔彰妻年二十五夫歿守節四十年

鄭氏洪皆吉妻年二十九夫歿守節撫孤五十七年

張氏洪魯玉妻年二十九夫歿孝姑撫子守節三十二年
秦氏管體元妻年二十二夫歿孝養翁姑訓子成立守節五十餘年

秦氏顧大成妻年二十九夫歿撫孤守節至七十四歲
趙氏顧從先妻年二十夫歿無子毀容獲髮守節三十六年

潘氏顧永達妻二十八歲而寡撫孤承緯授室後病歿婦
陳氏繼姑志越八載亦歿潘撫孫成立守節四十餘年
馮氏唐一龍妻年二十五夫歿現守節三十年

馮氏管良祚妻年三十夫歿孝事舅姑持家勤儉壽登九十四歲

王氏石思齊妻年二十九夫亡撫遺腹孤成立壽八十四歲

鄒氏適任附江年二十五夫歿無嗣閉門伴櫬以女紅爲活日常不舉火戚族憐而贈金正色却之歷二十七年以絕糧死數日人無知者

吳氏邑庠生天益女二十一歲適湯鳳儀一年而鳳儀故逾月生遺腹子郁文家益落中饋屢乏吳力勤針黹務得甘旨以奉舅姑已雖饋粥不給晏如也撫郁文成立守節三十五年五十七歲

馬氏葛爾新繼室二十九歲夫故所生子天柏甫百日前妻遺孤四人氏撫如已出教誨飲食一無所私婚娶畢

析腴產畀之柏取其瘠者壽八十四守節五十五年天柏入成均

陳氏生員吳椿妻年二十一夫歿子焯甫一週陳上事翁姑下撫幼子得以成立壽六十守節三十九年

徐氏葛學淮妻年二十八夫歿守節五十年

成氏王宗文妻年二十二夫歿守節五十年

顧氏趙尊周妻年二十八夫歿撫孤苦節四十四年

范氏陸惟義妻年二十九夫故現守節三十三年

丁氏汪鵠妻夫歿氏年二十二歲苦志守節年四十五歲

陳氏丁盛璐妻

趙氏黃賓樓母守節符例年七十三歲

劉氏丁源燠妻

劉氏顧鴻妻

張氏鄭夢熊妻

劉氏顧明義妻

陳氏丁盛鼎妻

謝氏張自修妻

冒氏國學馬觀妻

朱氏監生張璠妻

江氏吳必榮妻

沙氏監生范顯佑妻佑病刲股以進

姜氏監生葉青選妻刲股療姑

陳氏高枋里妻刲股救姑姑疾旋愈

張氏丁某妻刲股救姑人稱其孝

沈氏胡申錫妻刲股救母人稱其孝

徐氏附貢生管翼妻刲股療父人稱其孝

潘氏郭長榮妻二十八歲夫故貧苦無以爲生邁姑每泣

語叔幼不能兼養欲令改適氏毀面截髮以示不奪躬

親紡績針黹終姑之身以養以葬苦節四十餘年叔生

子如松承嗣以延夫後現年七十一歲

范氏郭臯如妻二十七歲夫故痛不欲生遺孤二長長存

次長守未離襁抱茹苦撫養俟其成立比長授室長存

援例入成均守節三十五年

沈氏儒童范敕之妻二十九歲夫故守節三十二年六十
一歲卒

胡氏季遵賢妻遵賢早卒氏二十八歲守節四十年六十
七歲終

季氏夏宗周妻十八歲適夏越二年夫歿翁姑在堂貧苦
無以爲養遺孤未滿週痛不欲生翁姑勸其撫孤以延
夏後氏卽矢志守節以鍼紉紡績孝事二老喪葬無缺
禮爲子上林娶婦生孫飲冰茹蘗歷今四十二年

許氏章成德妻年十九適章五年夫歿事太翁孀姑孝養
兼至子二鳳巢鶴巢俱各成立現年五十五歲守節三
十一年

何氏劉廷模妻年三十夫故撫孤茂如又早逝榮榮子立
一脈不絕如綫撫孫榮春成立守節三十八年

沈氏生員黃寧妻寧嗜學攻苦早逝氏年二十五歲椎心
泣血欲以身殉父母喻以撫孤承祧爲重乃啣悲茹苦
矢節完貞辛勤闡內政井井有條理善事舅姑盡孝道
姑病氏茹蔬誦金經每夕虔祈北斗願以身代旋愈族
黨嘆爲心誠天佑作詩以紀其孝教子耀文讀書成立
守節符例

石氏朱瑋孀妻青年守志矢死靡他體翁姑以孝事邁孀
太姑得其歡心太姑陳節載邑乘常語孫婦曰爾節孝
過人善事我願汝承嗣後必有以報汝也

王氏貢生朱以介側室十八歲適朱生而貞靜賢淑與嫡
周氏相得無間二十七歲朱歿矢志守節屏絕鉛華飲
冰茹蘖所生一女教以禮讓許字范丹樹爲之婚嫁朱
無子承姪蘭又無祿遺孤松茂松貞偕嫡撫養成立嫡
年逾八十死之日率家人治喪盡禮里黨謂朱氏藉以
不墜者王氏之力居多焉現年六十五守節三十八年
顧氏程心源妻顧崢次女

貞壽

叢氏羅思睿妻克嫻婦道家無間言中年爲未亡人教子
婦以勤儉長厚乾隆四十九年壽登一百有一歲子亦
槐爲具報請

旌
丁氏蘇公發妻壽一百有一歲五世一堂重曾孫蘇芳具
報乾隆四十六年

旌
章孺人瞿大綸妻烏程縣知縣敬賢母壽一百三歲乾隆
五十年

旌表建坊

謝氏千總冒珩妻壽一百五歲建坊

旌表迎春橋大街

張氏薛裕山妻現年一百歲

王氏西岍角周君亮妻壽一百歲


管氏顧有孔妻壽一百歲

錢氏王敦成妻壽九十九歲乾隆五十一年終

呂氏監生吳鳳岩妻壽九十九歲乾隆四十七年終

宗氏陳元濟妻壽一百有一歲

如臯縣志卷十九終



70003973

